


724  
LE  
DONNEZ-VOUS  
GARDE  
DV TEMPS  
QVI COVRT

MM. 4. p. 120 f.





**M***echan*\* *quittado la honrra*, disoit des Espagnols <sup>ils</sup> *a* le Marquis Spinola, pressé d'angoisses dans <sup>m'ont</sup> les tristes heures de sa mort; & avec ces piteux ac- <sup>osté l'hō</sup> cents s'acheminoit pour passer dans les Champs <sup>neur.</sup> Elizees, quand Caron d'une voix furieuse s'escria; *Qu'on me chasse cet Espagnol d'icy, de peur qu'il ne vienne troubler le repos des bien-heureux, comme ceux de sa nation font toute la terre en l'autre monde*; & en mesme temps on le saisit au corps pour le ietter hors de la Barque. A quoy faisant resistance, il remonstra qu'il estoit Italien, & si fameux, qu'il ne meritoit pas d'estre traicté de la sorte: Ce qu'au lieu d'appaiser ce farouche viellard, l'irrita davantage, luy reprochant sa lascheté, de parler le langage de ceux, qui n'ont autre dessein, que d'enchaîner son pays & le mettre en servitude: & cependant comme il ioignit la terre, il se desmella facilement de ceux qui ne luy voulurent faire de violence, pour le respect de son nom.

Arriuant dans des prairies voisines, les premieres personnes de cognoissance qu'il apperceut, furent les Ducs de Sauoye & Collalto, qui disputoiēt ensemble sur la prise de Pignerol; l'un soustenant qu'on le pouuoit secourir, & l'autre maintenant le contraire: *Je vous accorderay bien*, dit le Marquis, mettant l'espee à la main pour charger le Duc; qui se mit en deffence, & commencerent vne furieuse meslee, sans que Collalto se mit entre-deux, à cause des coups qu'il craignoit naturellement: & si Radamante ne se fust trouué prez de ce lieu, il y auoit apparence d'un grand desordre; mais faisant les ho-

A



4  
la, il voulut estre informé du sujet de leur querelle, fort estonné de l'inquietude du Duc, qui ne pouvoit demeurer en repos, & commandant le silence aux assistans, accourus en grand nombre, il ordonna aux interessez de faire entendre leurs raisons.

Illustrissime Seigneur, dit le Marquis, ie ne croy pas estre blasimé de ce que i'ay fait, ayant attaqué celuy qui est en partie cause de ma mort, pour ne m'estre voulu, dans le secours que ie luy donnois, gouverner selon son humeur impetueuse, boüillante & sans ordre, qui luy a cause & aux siens, d'auoir esté souuent despoüillez de leurs païs. Ie ne faisois pas difficulté d'hazarder ma personne, mais bien mon armee, me confiant plus dans mon art & dans mon industrie, qu'à la fortune, ayant tousiours naturellement eu plus d'inclination à chercher vne victoire, qui se peut obtenir sans effusion de sang, que de rien commettre au hazard : parce que quand on est sur la deffensive, le prudent Capitaine doit plustost temporiser & laisser cōsumer son ennemy dans les difficultez de faire la guerre en pays estranger, que d'auenturer l'Estat avec chose si inegale, comme le gain d'une bataille, contre vn homme qui n'a rien à perdre que son armee. Et à ce propos sert la responce de ce grand Duc d'Alue, au conseil qu'on luy donnoit de combattre les François qui se retiroient de Naples : Non, non, dit-il, ie ne suis pas resolu de iouer vn Royaume avec vne Casaque de toille d'or, que portoit d'ordinaire le Duc de Guise leur general.

C'est pourquoy, me trouuant des gens belliqueux en teste, commandez par le Cardinal de Richelieu, resolu de me combattre, ie fis mon effort

74

5

pour l'en empescher, ne voulant pas donner à ce ieune Aiglou moyen d'acquérir de la reputation à mes despeus, ce que ie luy fis entendre d'abord, & que ie me tiendrois tousiours enterré dans mes traualx, parce que *Non queria peliar con mi hijo*, qui estoit vne alliance d'amitié que nous auions eüe ensemble de pere & de fils à mon passage de la Rochelle: où, comme avec sincerité ie respondis aux questions qu'il me faisoit, & principalement sur le sujet de ce siege, où ie recogneus bien que le Roy s'estoit engagé sur son seul aduis, ie luy dis franchement qu'il auoit pris l'vnique moyen pour paruenir à la fin d'vne si grande entreprise, qui ne consistoit qu'en ces deux poincts: L'vn que ie voyois qu'il bastissoit son esperance par la pratique qu'il en faisoit, à sçauoir, *Abrir la manno*, c'est à dire, despendre largement, *y serrar el puerto*. Ce qui fut cause que me voyant parler avec cette candeur, apres plusieurs autres entretiens, nous contractames vne grande amitié, sans aucunemēt blesser les interests de nos Maistres, & pour monstrier qu'il la vouloit continuer, quoy que nous commandassions deux armées contraires, il me renuoya plusieurs paquets qui auoient esté surpris, sans auoir voulu en descheter vn seul, laquelle chose, bien que d'vn costé elle pouuoit auoir dessein de nous mettre en ialousie, neantmoins l'effet qui en parut, fut à mon gré si ciuil, que ie ne me peus tenir de le loier publiquement, qui donna suiet à mon eunemy de se forger cette fantaisie, que i'auois quelque Traitté secret qui luy estoit incogneu, que si cela eust esté vray, ie puis dire que le succez m'en eust esté fort heureux, parce qu'il ne tint qu'à moy seul que la paix ne fut



faite, toutes sortes de conditions raisonnables m'en ayant esté offertes.

Mais la chose estoit lors bien loin de ma pensee, aussi bien que celle de Collalto, ayans tous deux mesmes desseins sur differents lieux, luy ; celui de prendre Mâtouë, & moy, Cazal, que i'auois asseuré d'emporter en quarante iours, comme i'eusse faict, sans les accidents qui me suruindrent, qui empescherent que ie ne me peus preualoir de l'auantage que me donna le partement du Cardinal de Richelieu d'Italie, sur les entreprises qu'on faisoit contre luy dans la Cour de France. Et comme sa presence m'obligeoit d'estre tousiours retrenché aupres de luy, pour empescher ses progres, esperant qu'encores que ie ne le peusse quitter pour aller assieger Cazal, ie ne lairois de l'emporter par la faim, quoy qu'avec vn long temps : Aussi tost que ie l'eus veu partir, & en suite introduire la licence dans les forces qu'il laissoit, ie creus que bien tost elles seroiēt dissipées, & que partant ie pouuois tout entreprendre. Ce qui me fit resoudre, pour abreger le temps, de faire l'effort necessaire pour nous rēdre maistres de cette place, qui nous ouurit le chemin à de plus hautes conquestes. Et comme i'eus cōmencé, l'enuei m'accueillit de toutes parts : Collalto retirant ses Allemans de mon Armee, qui par ce moyen demeura si foible, que ie fus du tout impuissant pour l'executiō de mon dessein : Et le Duc, ayant enuoyé son Abbé Scaglia en Espagne declamer cōtre moy, obtint, que l'ō m'osteroit le pouuoir de plus traiter la Paix, pour le donner au Marquis de Sainte-Croix, petit fils de celui qui accommoda si bien les François à la Tercere, duquel on fit plus de cas que



de mon experience & sincerité: qui me fitc ōceuoir vn tel despit, que quasi sans auoir de fievre ie m'en allay à la mort, ayant mon esprit troublé & remply de haine contre cette nation qui m'a oſté l'hōneur.

Ce discours finy, le Duc commença ses plaintes, sur la confiance qu'il auoit prise en ces fastueuses inscriptions de la prise de Breda, *Quatuor regibus frustra conantibus*: qui le firent resoudre d'abandonner les François pour penser par là se conseruer la partie de Montferrat qu'il auoit conquise; & dans la perte de Casal se vanger du Cardinal de Richelieu, qu'il haïssoit mortellement, pour auoir porté le Roy à ne vouloir pas approuuer les oppressions qu'il faisoit & suscitoit au Duc de Mantouë: & au lieu de voir ces efforts capables de triompher contre tant de Roys, il vid au contraire ses pays sacagez en sa presence, par vn Prestre, au deuant duquel il ne fit que battre d'vne aisse, faisant de sa crainte, prudence, pour n'oser iamais affronter vn homme ruiné dans la Cour. Dequoy il auoit tresbonne cognoissance, comme ayant intelligence particuliere avec aucuns des principaux qui y trauiilloient en France; qui luy faisoit esperer, que dans les inquietudes où il pouuoit estre, il ne seroit pas difficile de le defaire, si on l'eust viuement attaqué. Au lieu dequoy, le temps se passoit en compliments entr'eux, pendant qu'il demeueroit deshonoré dans les accusations publiques qu'on faisoit contre luy, & du peu de confiance qu'on y pouuoit prendre, quoy qu'il n'eust iamais manqué de parole à ceux à qui il l'auoit donnee, comme le Roy Catholique le ſçait, le Grand Henry, ceux de Grenoble & de Geneue, & Henry III. mesme



ne luy dénieroit pas son tesmoignage, si la passion du Marquizat de Saluces nel'emportoit; Que pour conclusion il voyoit ses pays desolez, traiter la Paix sans luy, & enfin abandonnant du tout ses affaires s'en aller assieger Casal, laissant seulement avec luy Dom Philippes Spinola avec cét ordre, *De nuncia iamas pelcar con los Franceses.* Ce qui luy donna telle rage, apres la prise de Saluces, quasi emportee sur ses yeux, iointe à la perte de Mantouë, qu'une petite fièvre le saisissant l'emporta en deux fois vingt-quatre heures, apres auoir fait esclater en Espagne la douleur de tous ses complimens rendus à celuy qu'il hayssoit, au lieu de l'auoir chassé d'Italie avec son armee, comme il l'auoit esperé.

Le Marquis repliqua tout indigné, qu'il s'estonnoit de tels discours, comme si la ciuilité estoit vn crime entre les gens de guerre: ce qui n'estoit pas l'opinion de Cyrus & d'Alexandre, qui en auoient ysé avec excez enuers leurs ennemis: Et l'acte diuin de Scipion en Espagne, en la restitution d'un si grand nombre de Dames d'excellente beauté, qu'il ne vuloit pas mesme luy estre amenee (de peur, dit vn Romain) qu'il ne semblast qu'il eust cueilly, au moins des yeux, quelque chose du fruit de leur virginité, luy auoit acquis autant de gloire que la victoire d'Annibal. Ainsi que c'estoit vne grande iniustice d'accuser des actions, qui auoient esté si dignement pratiquées par ces grands hommes, qu'on pouuoit bien nommer par leurs merites les Dieux de la guerre, lesquelles n'vnissoient pas pourtant leurs interets. Car on ne me scauroit imputer d'auoir fauorisé les armes  
de



de France, ny au Cardinal celles d'Espagne, auxquelles il a preparé de longs exercices, qui recompenseront leur vnion en Allemagne, pour troubler les alliez du Roy Tres-Chrestien. Car par ses conseils & sage preuoyance on leur a suscité tant d'ennemis par tout, qu'il faut des siecles pour remedier à tous ces maux; Ne me pouuant assez estonner de la simplicité des Allemans dans leurs secours d'Italie, dont rien ne reuiet à leur profit, qui est tout pour les Espagnols, & le dommage pour eux: car cela obligera tout le monde d'esmouuoir tous les orages qu'on pourra pour porter dās leur pays l'infortune qu'ils veulent causer aux autres. A quoy les François ne sont pas peu considerables, maintenant que le party Huguenot est ruiné; qui estoit la seule & vniue rselle ressource du Comte d'Oliuares, qui se mocqua de moy quand ie luy dis, que s'il laissoit prendre la Rochelle il s'en repentiroit; croyant en son ame, qu'elle estoit imprenable, (comme à la verité à bon droit) elle estoit tenue pour telle de tous ceux qui la cognoissent. Et au lieu d'y apporter de forts obstacles, il s'amusoit à des ruzes & Traitez secrets, sur lesquels mal à propos il creut plus qu'à mes conseils, ayans pour but ma ruyne: Et cette passion le porta de s'arrester à des gens qui l'abusoient, faute de sçauoir les affaires qui requeroient en vn tel coup de partie vne bonne resolution, prompte & soudaine, qui fist effet, les finesses n'estans bonnes qu'aux affaires non presseees, qu'on traicte de loing & avec du loisir: & ne voudrois luy donner sur ce sujet vn meilleur exemple que du mesme Cardinal, à qui il en veut, lequel quand le temps requiert qu'on vse d'adresse,

nul homme du monde ne luy est esgal: Mais quand les choses pressent, il ne conseille pas lors des subtilitez, mais des Armees de trente mille hommes, qui suivent leur Roy en toutes occasions où il faut aller. Et c'est ce qui rend leurs affaires prosperes, & les nostres en mespris, & si on eust esté assez habile & assez diligent de tenir tousiours les François occupez au dedans, nous estions libres au dehors, & l'Italie estoit reduite sous le joug en cette rencontre, où nous eussions sans doute pris Casal comme Mantouë, & assujety Rome & tout le reste.

Quant à ce que le Duc proteste de sa foy inuiolable i'admire son asseurance, d'alleguer Espagne & France pour marque de sa fermeté, ayant cent fois trompé l'un & l'autre, comme Geneve, qu'en plaine paix il attaqua, & Grenoble, qu'il asseuroit vouloir secourir contre l'Esduigueres, & forcer le Chasteau de Mont-benaud pour leur rendre, ce qu'il executa avec leurs canons & leurs poudres, & puis le garda pour luy. C'est encorés merueilles, que pour marque de sa prud'homie il n'a allegué la Cōtessé de Sault, laquelle l'appella en Prouence, & pour recompense, il l'emprisonna, & eust couru fortune de la vie, si, vestuë en Suisse, dont elle auoit la taille, elle n'eust pris la fuitte sur vn cheual d'Espagne.

Partant, Illustrissime Seigneur, ie conclus aux peines que iugerez raisonnables, & qu'il aura meritees, ayant prealablement fait droit à la Marquise de Rive, pour n'auoir pas publié son mariage, comme il luy auoit promis.

Radamante, parties ouyes, & voyant, qu'au fonds il sembloit qu'obliquement ils se fussent faits



mourir l'un l'autre, les renuoya hors de Cour & de procez, leur faisant defense de se plus inquier l'un l'autre. Surquoy se separans, Albigny & Gauouret, ayans tousiours la main sur la gorge, & regardât le Duc de mauuais œil, suiuirent le Marquis, à la rencontre de plusieurs Espagnols & Italiens, qui se firent tous grand accueil, excepté le Duc d'Alue, qui avec vn ~~Nos~~ seulement caressa la compagnie, & le Marquis prenant la parole dit, qu'il venoit se ioin- dre avec eux, pour leur dire, que la coustume n'estoit point changee en Espagne, de mal traiter tousiours ceux qui leur auoient rendu plus de seruices. Et là se treuuerent Fernand Gonzales, le Cardinal Ximenes, le Marquis del Vvast, Iuan d'Austria : Fernand Gonzague, & le Prince de Parme, qui voulurent tous ouyr le desastre de ce valeureux homme, lequel il leur raconta : Et D. Iuan d'Austria prenant la parole dit, Ne vous plaignez plus, puis qu'à moy, apres auoir bien seruy, sans considerer ma naissance, il m'en a cousté la vie : Et à moy, dit le Prince de Parme, qui eus le commandement des Armees apres vous, qui scauez le miserable estat où vous laissastes la Flandre. & auez sceu depuis en quel lustre ie remis les affaires par la prise d'Anuers, qui esmerueilla tout le monde, & qui m'eust facilité le moyen de reduire ces Prouinces en obeissance, sans les deux voyages que fort mal à propos on me fit faire en France, pour recompence, on m'osta mes pou- uoirs, me renuoyant en Italie avec vn morceau, qui me fit passer icy dans la fleur de mon aage, m'ayant soupçonné d'auoir pensé à me conseruer ces Prouinces avec l'adueu & le soustien des Fran-



çois. Payement ordinaire pour ceux qui ont bien  
seruy ces gens. Je ne parleray point de moy, dit le  
Marquis del Vvast, parce que les François mesmes  
me louent, encores qu'ils m'ayent defait à Serizol-  
les: apres plusieurs signalez seruices, & auoir pour  
eux fouillè mon ame & mon honneur au meurtre  
que ie fis faire de Fregoze & Rincon, ils n'ont pas  
laissé pour cela de me despoüiller de mes charges.

Alors le Duc d'Aluë faisant trois ou quatre des-  
marches, & se releuant les moustaches avec cette  
mesme apparence d'orgueil, qu'il auoit tousiours  
eüe au monde avec vn ton graue & d'indignation,  
dit: Qui est-ce qui a seruy ces Princes en de plus  
grâdes charges, & avec plus d'autorité, que moy?  
Quel Capitaine y a-il eu depuis plusieurs centai-  
nes d'annees qui aye commandé si long-temps &  
porté leurs Drapeaux en tant de pays? Qui est-ce  
qui ne m'a veu faire la guerre en Italie, en Espagne,  
en France, en Hongrie, en Allemagne, en Flandre,  
en Afrique? & avec tout cela, ie fus, à la grâde mer-  
ueille de tout le monde, sans auoir eu esgard, ny à  
mon aage, ny à mes seruices, confiné dans Vse-  
de, pour auoir marié mon fils, qu'on auoit emprisonné  
sur ce qu'on lui vouloit faire espouser vne Dame  
du Palais, lui imputant qu'il lui auoit promis ma-  
riage: Et comme la resolution de la guerre de Por-  
tugal fut prise, ne sçachant sur qui ietter les yeux  
que sur moi: on me fit escrire par vn Secretaire seu-  
lement, pour me commander que dans trois iours  
i'eusse à me rendre à l'armee, qui n'estoit qu'à dix  
mille de Madrid, où estoit la Cour, sans que iamais  
on me voulut permettre d'en approcher: & ce qui  
ne fut pas moins estrange, c'est que le Roy faisant



prester le serment par tous les Grands au Prince D. Diego son fils, il refusa de me receuoir à cette action, qui se faisoit si proche du lieu où i'estois, ny ne m'escriuit, ny ne me voulut rien dire, ny traicter avec moy sur le sujet de cette guerre: qui me faisoit plaindre de ce qu'on m'enuoyoit conquerir des Royaumes traissant mes chaisnes: pour montrer, que le commandement d'une si grande Armee ne laissoit pas de faire voir à tout le mode, les marques de mon esclauitude. Mais cela ne m'estonne pas, puis que le Cardinal Ximenes, que ie voy là disant son Breuiare, n'en eut pas meilleur marché, ayant conserué luy seul l'Espagne à l'Empereur, foulée aux pieds par tous les plus puissans de l'Estat, qui ne pouuans souffrir son auctorité, luy demandoient lettre de sa vocation, qu'il leur monstra consister en ses hommes & en ses canons, avec lesquels il remedia à tous les desordres qui se presenterent: & pour sa recompense, on croit qu'on l'empoisonna, ne l'ayant peu reduire à se gouverner par l'aduis des Flamans, qu'on luy enuoyoit pour luy oster peu à peu son credit, qu'il n'employoit toutefois que pour le bien de l'Espagne & de son maistre.

Alors le grand Capitaine avec vn petit soufpris, dit: Et quoy, Messieurs, vous qui auez esté des derniers, & qui auez vescu après moy, comment est-ce que vos desastres ont esté plustost racontez que les miens? Et qui est-ce qui ne sçait, qu'après auoir cōquis vn Royaume, on m'a demandé compte de la depence? Mais i'arrestera bien mes Commissaires, quand ils virent le premier article, qui contenoit quatre millions en espions: & auparauant ils pensoient me payer de l'honneur que i'eus de faire le



quar à la table des deux Rois de France, d'Espagne, & sa femme, à Sauonne: & apres, qu'il leur seroit loisible de me traiter de Traistre, qui auois aspiré à me rendre maistre du pais, & fauorisé durant sa vie, l'Archiduc Philippe: à quoy ie ne songeay iamais, quoy que fust vn tres-aymable Prince, aussi sincere que son beau-Pere & sa belle-Mere estoient corrompus: comme ils le tesmaignerent bien, quand apres l'auoir engagé dans le Traité de Blois, où il auoit accordé la Paix en leur nom, il demeura affronté par la perte de Naples, que i'acheuoy de conquerir lors, suiuant l'ordre que i'en auois de iour en iour. Et si les François eussent esté aussi cruels comme ils sont bons, ils pouuoient luy faire payer les frais d'une telle perte, & ne le laisser pas aller si facilement comme ils firent. C'est pourquoy ie n'ay pas eu tort de dire, que pour m'obliger de croire vne autrefois aux serments de Ferdinand, ie voudrois qu'il iurast par vn Dieu qu'il recognuist, & auquel il eust croyance.

A la verité, dit le Marquis de Pesquaire, c'estoit vn grand trompeur. Il est vray, respondit, Ruy Gomez: mais ne voyez vous pas Moron, qui se moque, de ce que vous blasmez les trompeurs, veu le trait que vous lui iouïastes avec Antoine de Leue, & nonobstant vous n'avez pas laissé d'en taster comme les autres.

Alors le Prince d'Oria prenant la parole dit: I'ay esté le plus fin, car sçachant bien, qu'il n'y a point de seruices qui puissent obliger les Espagnols: & que par vos exemples ie voyois, qu'au lieu de grâces & recompenses ils conceuoient des ialousies & des soupçons, qui les auoient portez à vous per-



dre : pour euitier cela, qui n'a iamais manqué d'un seul de ceux qui ont esté des plus renommez parmy eux: apres l'entreprise d'Arger, que ie ne pris pas, ie renonçay à ma charge de General de la Mer, cōtre l'aduis de plusieurs, qui me disoient que telles choses ne se quittoient iamais volontairement: & fis voir, que ie le sceus dire & faire, & que sans eux ie pouuois viure avec lustre: car ie redoublay toutes mes despences, que ie continuay telles iusques à ma mort.

Je voudrois en auoir fait autant, dit D. Ferrand. Car apres de si longs seruices rendus à cette nation, ie n'eusse pas eu la honte d'estre depossédé du Gouuernement de l'Estat de Milan, pour le donner au Duc d'Alue, qui n'y fit rien qui vaille; & si ie n'eusse eu l'industrie de verifier la fausse escriture mise sur mes vrais seings, par l'artifice du Castellan & Chancellier de Milan, ie ne sçay à quel poinct de honte & de deshonneur on ne m'eust point reduit.

Alors le Prince de Parme, plus serieux que les autres, s'approchant de luy & du Marquis, leur dit: Nous sommes bien malheureux d'auoir tousiours seruy les rois d'Espagne cōtre nostre patrie. Vous auez plus de raison de vous en plaindre qu'aucun, dit le Marquis: car l'Empereur Charles fit tuer vostre grand Pere, & voulut despoiiller vostre Pere, & l'eust fait sans l'assistance des François.

A ce propos Ruy Gomez s'aprocha avec sa gentillesse accoustumee, excusant cette action, & disant que l'Empereur n'y auoit point de part, & que c'estoit vne conspiration des Citoyens pure & simple, qui auoit esté preueuë par un Negromantien,

qui enquis du Duc Pier-Luigi de sa fin, luy fit mettre sur vne table vne teste de mort, couuerte de chādelles de cire noire, de laquelle sortoit vne voix disant, qu'il deuoit estre tué, & que le nom de ses meurtriers estoit escrit dans le reuers de sa Monnoye, où il y auoit *PLAC*, qui vouloit dire, *Placentia*. Et de faict, Palauincini, Landi, Anguiscioli, Conti, designez par ces quatre lertres, furent ses massacreurs, & non pas l'Empereur.

Horace Farneze, Duc de Castré, s'estoit approché à ce discours, & prenant la parole, dit: Vous disputez tous de cette action deuant Dom Ferrand qui en fut l'auteur, ou pour le moins il en donna le conseil. Ie n'y ay nulle part, dit le Gonzague, & de cela on ne peut accuser l'Empereur, que d'auoir approuué le faict, & gardé quelque temps Plaisance aux Mineurs, comme il se void par les quatre vers qui en furent faicts bien tost après, que ie porte tousiours sur moy; à cause que plusieurs m'en ont voulu blasmer: & pour ma iustification ie m'en vay vous les lire.

*Cæsar in iussu Farnesius occidit heros:*

*Sed iussu data sunt præmia sicarijs.*

*Tres sunt hæredes, Dux Margherita Gemelli:*

*Hunc socer, hanc genitor, hos spoliavit auri.*

Par là vous voyez qu'Vlloa Auteur Espagnol est vn menteur, qui escriuant la vie de l'Empereur, l'accuse d'auoir fait ce meurtre.

Ne parlons plus de cela, dit le Duc de Parme, l'opinion la plus fauorable des deux ne vaut rien; & pleust à Dieu que i'eussé seruy ce Prince que ie vois s'approcher de nous! i'aurois vescu plus long temps, & aurois esté mieux recompensé.

Surquoy



Surquoy tournant visage ils apperceurent le Grand Henry, avec vne grande suite; & luy, appuyé sur les bras de Villeroy & du President Ianin, s'arresta sur le bord d'une grande fontaine, où soudain la Varenne arriua, tenant en ses mains plusieurs pacquets, qui furent deliurez à Villeroy pour les deschiffrer. Le Roy demanda cependant, Quelles nouvelles courent? I'ay ouy parler de quelques parties contre le Cardinal de Richelieu. Qu'est-ce? Cela n'est rien, dit Villeroy, s'il n'est suruenue quelque chose depuis les dernieres despeschés, qui portoient le desordre suruenue, & le racommodement qui auoit suiui, à la grande instance qu'en auoit fait le Roy. I'en suis bien aise dit le President Ianin: car ie l'ay tousiours estimé, & creu qu'il reüssiroit aux affaires, & lui ay dit souuent qu'il prist courage, & qu'il auroit son temps, & vostre Majesté mesme le voyoit de bon œil dès qu'il estoit Euesque de Lusson. Quoy? dit le Roy, c'est le frere de Richelieu? Il est vray que ie l'aimois, & vous sçavez bien & Monsieur de Villeroy, que i'estois resolu de le faire Cardinal, & l'eusse mis dans mes affaires si i'eusse vescu plus long temps. Il y a bien reüssi; dit Zamet: car depuis qu'il est au Conseil, toute la France a changé de face: & quand ce ne seroit que la Rochelle est prise & razee, il y auroit de quoy se contenter. Comment, dit le Roy, cela est-il possible, Roquelaure? auez vous entendu ce qu'il dit? Ouy, Sire, respondit-il: & qui ne le sçait pas? Et le bon sentiment qu'en montra vn homme que vous cognoissez bien, quand il en eut la nouvelle, s'escriant, nous sommes perdus. Il est vray qu'il vsa d'un mot plus sale qui rime à cettui-là:



mais on ne l'oferoit dire icy. Et pensez-vous qu'on viue à cette heure comme au temps du viêil siege, où vous & les autres l'empeschiez, & preniez autant de peine à la sauuer qu'on a fait à cette heure à la prendre? Et donc les pauures Huguenots sont reduits à Montauban, Castres, Millaud, Nismes & Vzez, dit le Roy? Rien de tout cela, Sire, dit Roquelaure: car toutes ces places n'ont plus ny fossez ny bastions: & sur la foy du Cardinal, Montauban a receu telles forces qu'il a voulu, & les a retirees trois iours apres, n'ayant fait vn seul logement dans les maisons, demeurans tousiours sur leurs armes dans les places & les ruës, sans qu'il aye esté pris vn morceau de pain qu'en payant. Je ne sçay si ie dois croire ce que vous dites, respond le Roy, car ie le trouue estrange. Et les Seuennes, Foix, le Dauphiné & le Viuarets, tiennent pour le moins encores? Rien de tout cela, dit le Vicomte de Portes: toutes ces Places sont Catholiques, bruslees, ou sans fortifications. Comment bruslees? dit le Roy. Ouy, bruslees, Sire, respondit-il: car Priuas a esté mis en cendre, pour chastiment d'auoir esté l'origine de toutes les seditions, & la premiere qui aye voulu se deffendre contre le Roy vostre fils, depuis son retour d'Italie. Il n'y est pas demeuré pierre sur pierre, dit le Marquis d'Uxel: car il'en ay bonnes relations, & qui portent que dans les Montagnes de Viuairets l'armee y voloit, & que iamais autre Roy n'y auoit passé: Qui a donné vn tel effroy à tout le reste, qu'Alets estant aux abois se rendit, & là tous les Deputez Huguenots y vindrent & y firent la Paix. Nous auons veu l'Edict avec merueilles, dit le President Champigny



( touffant & crachant, de peur que le Garde des Seaux du Vair ne luy reprochast encores qu'il auoit la gorge pleine d'arestes quand il opinoit : ) Car tous les precedents Edicts portoient tiltre simplement d'Edict, & Declaration faicte par le Roy sur la pacification des troubles de ce Royaume. Mais cettuy cy porte, Edict du Roy sur la grace & pardon donné au Duc de rohan, au sieur de Soubize, & à tous autres subjets rebelles, avec l'abolition des negotiations tant avec les Anglois qu'avec le Roy d'Espagne & Sauoye, & le bannissement des Chefs : chose qui ne s'estoit iamais veüe iusques à maintenant, qui a donné grand honneur au Cardinal, & grande flettrisseure à ces pauvres Freres en Christ, qui n'ont autre consolation dans leur defastre, sinon celle de mourir de la main d'un si grand Roy.

Pour les Anglois, ie leur pardonne : car ils sont de mesme religion qu'eux ( dit le vieux Duc de Mayenne. ) Mais avec les Espagnols, i'en doute, encores qu'on le die. Car depuis qu'ils se virent trompez de ces fameux Estats de Paris, i'ouys iurer plusieurs fois le Duc de Feria, & Dom Diego d'Iuara, qu'ils ne hazarderoient iamais plus leur argent en France. Ils l'ont fait si souuent depuis, dit le Chancelier de Sillery, qu'il ne faut pas s'asseurer en leurs sermens. I'ay veuleur dernier Traitté avec les Huguenots & le Duc de rohan, qui est bien construit selon l'humeur d'Espagne. Car il porte, Que ce que le Roy en fait, est comme estant estroitement obligé à la conseruation des Estats & Royaumes qu'il a pleu à Dieu luy donner, & à cét effect de se seruir de tous les moyens propres, licites &



neccessaires qui se presenteront, & le tout sans autre  
 interest, que celuy de la plus grande gloire de  
 Dieu. Pour à quoy paruenir il faut payer les Hu-  
 guenots, pour maintenir la guerre dans le royaume.  
 Ce qu'ayant sa Majesté fait voir en son Con-  
 seil de conscience, composé de gens de grande in-  
 tégrité, il a iugé estre conuenable à la iuste defense  
 de ses Estats, contre vne si iniuste action, comme  
 celle que le roy de France fait, violant tout droit  
 & iustice (qui estoit de ne luy vouloir pas souffrir  
 l'oppression de ses alliez.) Et pour paruenir à leurs  
 fins, ils offrent trois cens mille ducats pour l'entre-  
 tien des gens de guerre en Prouence, Languedoc,  
 & Dauphiné, & quarante mille de pension au Duc  
 de Rohan, huit mille à son frere, & dix mille pour  
 ceux qu'ils voudront gratifier: Moyennant quoy  
 ils entretiendront tousiours la guerre tant qu'il  
 plaira au roy Catholique durant les iustes causes  
 qu'il a de ce faire. Croiroit-on iamais telles choses  
 de ces gens-là, qui ne seroit bien informé de toutes  
 leurs procedures? Ce n'est pas la premiere fois, dit  
 le roy, qu'ils s'estoient voulu seruir des Hugue-  
 nots. Car de mon temps ils me firent de grandes of-  
 fres, & n'y voulus entendre, & nul de mon Con-  
 seil ne pensa iamais de m'en parler; C'est pourquoy  
 ie m'estonne comme ceux-cy se sont laissez empor-  
 ter à vne telle faute; & comment les Espagnols qui  
 font tant les religieux, & m'ont tousiours repro-  
 ché l'assistance que ie donnois à mes alliez de con-  
 traire religion, se sont voulu charger d'un si grand  
 deshonneur. Ils n'ont iamais fait autrement (dit le  
 Pere Coton) car ils ont tousiours eu la religion dās  
 leurs levres, & rien moins que cela dans le cœur.



Vostre Majesté protegeoit les heretiques, non commetels, mais comme ses Alliez, que par honneur & par la iustice des Traitez vous ne deuiez pas laisser perdreny empieter, afin de vous conseruer l'affection de tous ceux qui sont attachez auec la Couronne: & puis n'est-ce pas impieté, de croire que les Princes heretiques ne soient pas Princes legitimes dans leurs Estats, & que la diuersité de croyance empesche le droit de proteger ceux auxquels on l'a promis, quand on veut vsurper leur bien? C'est vn point delicat que vous traitez-là, mon Pere (dit le Cardinal de Berulle) & croy qu'il vaut mieux n'en parler point du tout: car il y a penchant de tous costez. Pourquoi Monsieur, (dit le Pere?) Salomon ne bastit-il pas le Temple de Dieu auec l'ayde des Tyriens idolatres, & les Macabees, qui estoient aussi gens de bien que nous. Perdirent ils leur reputation, pour s'estre alliez auec les Romains? Mon Pere, n'en parlons plus (dit le Cardinal) vous scauez bien que le Roy de Iuda fut blasme par vn Prophete, de s'estre allié auec le Roy de Syrie. Non pas de l'alliance, dit le Pere, mais de sa trop grande confiance en ce secours, comme en sa maladie en celuy de ses Medecins, qui ne fit pas pourtant condamner la Medecine. Partant ie persiste & dis, que pour se defendre & ses alliez, il est loisible de se seruir de tous moyens licites & possibles; & de ceux mesmes qui ont esté aux siècles passez pratiqués par les Espagnols, qui sont tant les scrupuleux.

Mon Dieu, dirent en soupirant le Greffier Senault & Chassebras, les Espagnols nous ont tousiours semblé si bons Catholiques, que pour mou-



rir ils ne voudroient pas auoir aucune communication avec les Heretiques, suiuant le dire de l'Apostre. *Nec dixeris eis Aue.* Vous l'entendez, replique le Pere: Et Ferdinand Roy d'Espagne, par le conseil de Roderic, ne se seruit-il pas des Mores pour se defendre contre le Pape, le Concile & l'Empereur Henry second; par le moyen dequoy il se garantit de la sujession de l'Empire, où l'on le vouloit reduire? Et que direz-vous de cette horrible alliance d'Aurelius avec les Mores, leur payant tous les ans cent ieunes filles de Tribut? Et l'Empereur Charles, pour parler des temps voifins, à la prise de Rome, n'auoit-il pas huit mille Lansquenets Protestants, qui commirent toutes sortes de sacrileges & d'impietez aux Eglises & choses sacrees par l'espace de sept mois, qu'ils tindrent le Pape Clement assiegé dans le Chasteau S. Ange avec tous les Cardinaux? Et ne sçauiez-vous pas, dit le Cardinal de Peleué, que ce pieux & tres-pieux Empereur en prit le dueil, & fit faire processions generales en Espagne, lors qu'il sceut sa deliurance? Et vostre Eminence ne sçait-elle pas, dit ce bon Pere, que c'estoit se moquer de Dieu & des hommes? que c'estoit luy qui le tenoit prisonnier, & qui ne le mit iamais en liberté, qu'apres luy auoir fait payer huit cens mille escus, & puis il en solemnisa la feste? Mais que dis-ie, ou que ne pourrois-ie dire sur ce sujet? Ce mesme Empereur ne fit-il pas ligue offensiue & defensiue avec Henry huitiesme d'Angleterre, qui auoit renoncé sa foy, & repudié sa Tante, pour espouser sa Garce; & cela pour auoir plus de moyen de ruiner la France.

Ne fit-il pas vn autre braue trait, de prendre &



se servir des Galleres du Pape pour restablir Mul-  
leassen Mahumetiste dans Tunis, qui en auoit esté  
chassé par Barberousse, Mais son fils Philippes se-  
cond, en tout le reste de ses actions vn des plus sa-  
ges Princes du monde, à quoy pensoit-il, quand il  
abandonna ses subjects naturels à la mercy des He-  
retiques, qu'il estoit obligé par droit diuin & hu-  
main de conseruer, & d'en rendre bon compte de-  
uant Dieu, pour venir faire la guerre en France, où  
il n'auoit point d'interest, & despandre son argent  
ailleurs, & laisser perdre ses pays? Et ceste coustu-  
me est la raison pour laquelle on se bande contre  
cette nation, à l'imitation des autres Roys d'Es-  
pagne, qui s'vnirent tous contre Alphonse VIII.  
Roy de Castille, faisant la guerre aux Mores, pour  
ne le souffrir pas s'accroistre & se rendre trop puis-  
sant.

Demandez à l'eminentissime Cardinal d'Ossat,  
s'il n'escriuoit pas autrefois, qu'il aymoit mieux les  
Espagnols dans les Pays bas vieillissans, harassez,  
blessez, & meurtris, que non pas de les voir dans  
les costes de France, puis que ce n'est leur humeur  
de ne laisser pas le monde en paix? Je croy que pour  
le salut des Estats, il ne faut pas tousiours attendre  
que Dieu face des miracles, & qu'il est permis de se  
servir des moyens qu'il a donnez pour se deffendre  
contre les ysurpateurs de son bien, ou de l'autrui.

Au moins ne desaduouerez-vous pas, dit le cele-  
bre Bussy le Cler, que l'Allemagne & le S. Siege ne  
soient fort obligez à la maison d'Austriche: car sans  
elle il n'y auroit plus ny Pape ny Religion. Vous  
me pardonnerez, respond le Pere: car s'ils en eus-  
sent esté creus, ils auroient esté maistres absous de



21  
l'un & de l'autre. C'est pourquoy le Pape & les Alle-  
mans sont les plus interessez de s'opposer à la  
grandeur de cette maison, qui ne pretend qu'à met-  
tre bas le premier, pour en disposer à sa mode; &  
abolir l'élection des Empereurs, pour se rendre  
l'Empire hereditaire, De là est venu que vous avez  
veu tant de guerres collorees de Religion, & les  
Papes si souvent mal menez & outragez en leurs  
personnes & en leurs seruiteurs: & sans parler de  
tous, i'allegueray seulement Frideric II. qui à la  
persecution y adjoustoit la risée, quand ayant par  
ses adherans fait prendre sur la mer trois Legats du  
Pape, & plusieurs Prelats, comme on enuoya vers  
luy sçauoir ce qu'il vouloit qu'on en fist, il mit seu-  
lement au bas de la lettre qu'on luy escriuoit ces  
deux Vers.

*Omnes Prælati Papa mandante vocati,  
Et tres Legati veniant hucusque Legati.*

La memoire de cette action iointe à plusieurs au-  
tres, deuroit tousiours faire trembler les Papes, &  
considerer que l'Empire estant en vne famille si  
puissante, engendre cette crainte vniuerselle de  
tous les hommes, qui maintient le Schisme, rend  
l'alliance des Princes Schismatiques necessaire, &  
fait qu'il est difficile de voir iamais la Paix en la  
Chrestienté.

Et quoy que le Roy eust pris grand plaisir en  
cette digression: neantmoins l'impatience le prit  
d'entendre la lecture de ces Lettres, qui luy fut fai-  
te par Villeroy: lequel pour en faciliter l'intelli-  
gence, prit l'affaire de plus haut, & parla de ce pas-  
sage admirable des Alpes que son fils auoit fait, &  
forcé le Pas de Suze: que la forteresse luy auoit esté  
renduë



renduë: qu'il auoit secouru Casal & traité avec le Duc de Sauoye, pour conseruer la liberté d'Italie, & empescher l'oppression du Duc de Mantouë: En suite, dequoy estoit suruenüe la ruine des Huguenots, & la Paix: & parce que tout cela auoit esté contredit par aucuns deuots prétendus. Le Cardinal de Richelieu demeura ferme en son aduis avec le Marechal de Schomberg, que l'euenement a fait voir le seul & vnique qu'il falloit suiure: & neantmoins cela luy a causé la haine de plusieurs, qui firent tant par leurs artifices, qu'il fut traité comme nostre Seigneur. Car par tous les chemins où il passa, les peuples les remplissoient de Romcaux, & bien-tost apres on le voulut crucifier.

Après cela, pour faire la guerre ou la Paix, on iugea que sa personne estoit necessaire en Italie, ayāt à faire avec Spinola, & au Duc de Sauoye, incessant en ses desmarches, & qui vouloit faire le neutre au commencement: mais comme on le pressa de parler clair, on le veid en vn instant se declarer ennemy de la France: qui fut cause que, sans temporiser dauantage, on s'alla loger sous Pignerol, qui fut emporté en vnze iours, ville & Chasteau, à la barbe des Espagnols, Spinola, Collalto, & le Duc, y estans en personne. Quoy? Pignerol est entre les mains de mon fils? cette place si necessaire pour les entrees en Italie? Il me souuient que lors de mon grand dessein, i'auois donné charge à Bullion, duquel ie me seruois fort, de n'accorder rien avec le Duc de Sauoye, qu'en me donnant pour seureté cette place, que ie tenois fort importante; Et pour laquelle auoir renduë vn peu legerement, le Roy mon predecesseur fut fort blasimé autrefois.

Mais il y a bien plus, dit Villeroy: car on a fortifié Briqueras, emporté les Forts des Vallées, Auigliane, Saluces, toute la Sauoye, excepté Montmelian qui ne se peut secourir, battu les Espagnols auprès d'Auigliane, à Carignan, & fait lever le siège de Casal, sans se soucier des protestations qu'un certain personnage faisoit, déclarant qu'il n'estoit point de cet avis, puis qu'ils sçauoient le Traicté fait à Ratisbonne, lequel il valloit bien mieux suivre, que d'aller hazarder leur vie & la reputation des armes du Roy, en un voyage qui de soy estoit impossible, & plein de tant d'inconueniens; que le profit qui en pouuoit arriuer estoit si petit au prix, que c'estoit temerité & tres-mauuais conseil d'entreprendre d'vser de force pour vne chose qui estoit assésurée & entre leurs mains.

Mais le Marechal de Schomberg, qui est de vostre nourriture, qui fut fort bien secondé de ce brave vieillard le Marechal de la Force, considerant la gloire qui s'acqueroit en secourant cette place, le bien qui en reuenoit au Roy, couronnant par là toutes ses actions passées, qui perdoient autrement beaucoup de leur lustre, & les serments, faits sur ce sujet au Cardinal de Richelieu, qui eust encores entrepris ce voyage & commandé l'armée pour le secours, sans les machines de la Cour contre luy, & se voyant mis en la place de son plus cher & meilleur amy, a esté si heureux, que d'auoir executé ce qui sembloit impossible aux Espagnols & à plusieurs autres, qui ne croyoient iamais, que dans un pays ennemy on peut conduire vne armée, & la nourrir pour le temps qui ieroit necessaire à cette entreprise. Il surmonta neantmoins toutes ces dif-



ficulitez sur la terre, comme celles de la mer au secours de Ré contre les Anglois, qu'il deffit si brauement, qu'il se peut vanter d'auoir acquis la gloire des deux plus belles actions que Capitaine aye fait de cinq cens ans en France.

Ce Cardinal l'entend (dit le vieil Mareschal de Brissac) d'agir ou faire agir avec telle resolution. Car contre les Espagnols il n'y a que d'estre hardy comme ie l'ay pratiqué commandant des armées en Piedmont, où du commencement que Ferrand Gonzague vint contre moy, il brusloit & rauageoit tout. Ie le requis de bonne guerre sans qu'il me voulut ouyr: ce que voyant, ie fis comme luy: & en mesme temps il me demanda ce qu'il m'auoit refusé. Mais ie trouuay bien plus plaisant, quand le Duc d'Alue fut mis en sa place, qui arriua en Italie avec vn son de brauades & de menaces, qu'il sembloit qu'il deust tout foudroyer. Ses appats furent pompeux. Dans la seule ville de Milan il fit vne leuee de huit cens mil escus, vne nouuelle fontaine dans le Chasteau de trente canons, fait publier vne leuee de neuf mille bœufs pour les Charrois, fait faire nombre de batteaux portatifs, fait venir d'Allemagne par le Lac de Garde des milliers de caques de poudre, comme aussi de Gennes & Naples, & bien qu'il eust vne armee de trente mille hommes, & cinq mille cheuaux, equipage de quarante canons, & assignation pour l'armee, de six mois, il publioit hautement de nouuelles leuees de dix mille Italiens, & autant d'Allemands: ce qu'il faisoit pour faire peur, & donner esclat à la grandeur de son Maistre. La fin de cela fut, que ie luy enleué Vulpian, place importante à nos affaires

& qu'il s'alla eschoïer deuant Sentia, lieu inco-  
gneu, que i'auois fortifié: où ayant perdu beau-  
coup de gens, ie l'en fis desloger avec tant de desor-  
dre, que laissant Sigismond Gonzague dans les  
tranchees avec neuf Compagnies de son Regiment,  
& tous les Marchands & Viuandiers, il nous don-  
na moyen de faire bonne chere sans nouuelle des-  
pense, & sans plus sejourner, quitta le Piedmont,  
& s'en alla au Royaume de Naples, contre le Duc  
de Guise, qui eust mieux fait de croire mon con-  
seil, d'acheuer le Milanois qui nous estoit facile, &  
puis le reste estoit entre nos mains. Je redis encore,  
qu'à l'endroit des Espagnols, il n'est que d'y aller  
la teste baissée: on les trouue souples, pourueu  
qu'on ne les marchande point, comme ie voy qu'a  
fait ce Cardinal, qui a beaucoup de conformitez  
avec moy, & principalement celle-là, d'estre fidelle  
à son Maistre, & tousiours trauersé comme ie l'ay  
esté par mes ennemis, qui comme les siens ont  
mieux aymé hazarder de tout perdre, que de laisser  
faire le bien.

On escrit, dit Villeroi, suivant ce que dit Mon-  
sieur le Marechal, que toutes ces menees ont fait  
vne grande playe à la France: car elles firent partir  
le Cardinal d'Italie, ou son Armee, qui auoit ves-  
cu avec ordre & grande discipline, faisant payer &  
chastier, se licentia à mille desordres: en fin tout se  
dissipa par son absence; & par la propre confession  
de Spinola, s'il eust demeuré, Casal n'auroit point  
esté assiégué, ny, peut-estre, Mantouie pris. Car les  
Allemands estans contrains par sa presence de de-  
meurer tousiours vnis & ioints avec Spinola, ils  
n'auroient pas eu la liberté de retourner à cette en-



treprise si malheureusement & si facilement executée : & cette nation s'estant portée si insolamment contre les allies de la France, fait bien voir son ingratitude. Car si on n'eust point appaisé les troubles qu'ils auoient, & laissé faire Bethlen Gabor, il eust secouru la Boëme, auquel cas ils se seroient trouuez tellement occupez, qu'ils n'auroient pas eu le moyen d'aller au sac de l'Italie.

Mais en fin à quoy aboutit cét affaire du Cardinal, dit le Roy? qu'on l'a voulu esloigner de la Cour, dit Villeroy. A cette parole tous les assistés firent vn cry, avec vn Iesus, les mains jointes, qui fut entendu de toutes les campagnes voisines, montrans par là l'estonnement d'une telle nouuelle, qui attira beaucoup de gens, les vns dolents, & les autres qui s'en resioüissoient. Le Cardinal Polus dit en son Anglois, que Buquinkan voudroit auoir donné cent mille liures Sterlins, & qu'il fust par terre. Le Duc de Lerme replique: cela n'est rien, car D. Iuan de Villela m'a m'a dit, que l'Oliuares en doneroit deux millions d'or, parce qu'il a perdu ses escrimes contre luy, avec grand peril des Estats de son Maître. Ses fougues estoient bonnes contre moy qui estois vieux, & mes enfans foibles & de peu d'esprit, & tous ensemble hors de la faueur que nous auions eüe: mais contre vn grand Royaume, qui a vn ieune Roy belliqueux, assisté de bons & fidelles Ministres, luy qui n'a iamais forté du pays, ny veu ny guerres ny affaires, pensoit-il que toute la terre deust obeyr à sa fortune? Il s'est trompé, & se trompera tant plus il ira auant. Il a faict brèche à l'honneur d'Espagne par les vsurpations iniustes qu'il a entreprises, qu'il a faillies, & aus-

quelles il ne cessera iamais de traualler pour repa-  
 rer sa faute, qui sera, tousiours plus grande, & en  
 fin le ruintera. Car comme on sera lassé de ses de-  
 foidres, on l'accablera. Et comment s'en pourroit-  
 il garentir, puis que i'ay fait naufrage, moy qui  
 estois aussi doux qu'il est turbulent? qui n'auois au-  
 tre but que de maintenir les deux Couronnes en  
 paix pour cōseruer nos Indes, & maintenir la guer-  
 re en Flandre contre les maudits rebelles & mes-  
 creans? On a veu comment de mon temps les cho-  
 ses sont allees avec prosperité, & depuis que cēt  
 estourdy gouuerne, on voit au contraire les Indes  
 rauagees. Les Heretiques qui ont quasi tousiours  
 tenu la campagne, pris les places imprenables de  
 mon temps, & avec cela il a esté si peu sage, que de  
 reueiller la guerre en Italie, que i'auois tousiours  
 empeschée quoy. qu'il y eust le Comte de Fuentes,  
 assez mal aisé à gouuerner, qui ne demandoit au-  
 tre chose par les bons conseils que luy donnoit le  
 Duc de Sauoye: mais i'etenois la chose si perilleuse,  
 que ie m'y suis tousiours opposé, pour estre biē plus  
 aisée à commencer qu'à finir, comme on le verra à  
 cette heure que les François y ont pris pied, qu'il  
 sera bien difficile de leur oster, estant à craindre  
 qu'ils ne vueillent laisser là tousiours vn os à ronger  
 aux Espagnols, qui les ruynera à la fin. C'est pour-  
 quoy ie croy, que non seulement Oliuarez vou-  
 droit donner deux millions, mais quatre, & qu'on  
 l'eust ruyné; de crainte qu'il ne les face perir: parce  
 qu'il est si heureux, que tous ceux qui luy sont con-  
 traires perdent la vie, comme Buquinkan, le Duc  
 de Sauoye, Spinola, Collalto, & plusieurs autres.  
 Et luy mesme a desia eu quelque secousse: qu'il



prenne garde à luy: car il n'y a point de sagesse contre la fortune.

Après l'estonnement passé de tous, le Roy demanda si c'estoit son fils qui auoit voulu si mal recompenser vn tel seruiteur? Non, Sire, dit Villeroy, au contraire il l'a soustenu. La chose vient d'ailleurs. Mais le bon que i'y vois pour luy, c'est qu'on l'a attaqué dans son fort, c'est à dire, dans vn temps que tout le monde disoit du bien de luy, & avec raison, veu les grands seruices qu'il venoit de rendre, & ses bonnes intentions qu'il ioignoit à celles du Roy, de bien tost faire leuer & oster la plus part des pesants fardeaux dont le pauvre peuple est chargé; & sur tout de faire bien tost esclorre ce bien dans la bonne ville de Paris. Car si la chose eust esté autrement, ie crois qu'il luy fust arriué comme à Aristides, de souffrir du mal pour estre homme de bien, sçachant de bonne part qu'il est tel, & qu'il craint Dieu, auquel il a la mesme confiance de Iob, quand il disoit, *Pone me iuxta te, & cuius vis manus pugnet contra me.*

Ie loue mon fils, dit le Roy, de l'auoir maintenu: car s'il l'eust abandonné, il perdoit tout son credit, & n'eust iamais trouué hōme qui l'eust voulu seruir: & de plus, il estoit à recommencer: car il est le maistre maintenant, où n'ayant plus vn tel Ministre, il eust bien eū des affaires à desmesler, ne cognoissant point d'hōme à mettre en sa place, & quand il en auroit, auant qu'il y fust accoustumé comme avec cettuy-cy, son Royaume & ses affaires seroient en grand desordre, veu que tous changements de telles personnes sont tres-perilleux. C'est pourquoy ie croy qu'on ne le pouuoit laisser

aller, car il estoit trop necessaire.

Cen'est point necessité, Sire, qui le fera retenir, dit le President Ianin: c'est amitié. Car ie sçay bien que le Roy l'aime, & doit biē hayr ceux qui auoient fait cette menée. Et qui sont-ils, dit le Roy? Marillac en est vn, Sire, dit Villeroy, qui pour payer le Cardinal de l'auoir esleué: l'a voulu ruyner? ne se ressouuenant plus qu'il auoit vescu sous le Chancelier de Sillery, sans auoir iamais eu autre commission de luy, que de dresser les bancs & les escabelles aux Estats de Nantes, & de visiter les escrits de Seruin. Attendez, dit le Chancelier de Sillery, il en eut encore vn autre. Mais ie veux que vous sachiez auparauant, qu'avec sa pieté, apres ma disgrâce à Tours, à la table du sieur Mangot qui eut ma place, & ne la garda gueres, il médisoit de moy publiquement; & dès que ie fus remis, il ne laissa d'estre des premiers à se trouuer en mon cabinet: & le soir comme on me pensoit donner cet aduis comme vne nouuelle, ie respōdis que ie le sçauois bien, mais qu'il falloit laisser telles choses comme les pierres dedans les mauuais chemins, lesquelles si on vouloit toutes ramasser, on succomberoit sous le faix, qui estoit cause que ie n'en voulus faire cōpte. Or ce que ie vous voulois dire est, que sous le pretexte de cette deuotion que vous sçauiez, il songea à vne affaire, que ie confesse qui me fit rire, me proposant de rallumer vne lāpe fondée par Charlemagne à Aix la Chappelle, (notez cela) qui au grand deshonneur du royaume estoit esteinte depuis quelque temps: ce qu'il fit sonner si haut, que pour l'appaiser & contenter son zele, ie luy donnay encore cette commission. Mais ce qui fut bon, &

dont



dont ie ne me meslay pas, c'est qu'il trouua moyen sur ce subject de faire donner quatre mille escus pour les employer (disoient-ils) en ornemens, qui obligeassent les Chanoines de r'allumer ce feu qu'ils auoient laissé esteindre. Dequoy tous semirent à rire. Et apres, Villeroy reprenant la parole, dit: On le tira enfin des Maçons des Carmelines pour le faire Sur-intendant des Finances & Garde des Séaux, & avec sa beatification supposee, ne pouuant assouuir son ambition, il voulut faire ruiner son bien-facteur pour prendre sa place: au lieu dequoy il a esté chassé, son frere emprisonné, & sa reputation diffamee. Et dit-on, qu'au mesme lieu où il auoit si long temps exercé son humilité, la resolution fut prise d'executer ce qu'il auoit conseillé de faire; qui fut remarquee par vne Dame s'estant trouuee là, qui dit en passant, ou par congratulation de ce grand ouurage, ou craignant peut estre de perdre au change, Dieu vous doint bien faire, sans auoir autre responce du Beate, qu'un petit soufris. Sardonique, avec lequel il s'en alla fort gay, pensant que dans trois iours il seroit le seul gouuerneur de l'Estat. Il ordonnoit pour les Finances d'Italie, qu'elles seroient mises entre les mains de celuy que son frere nommeroit, donnoit les heures des conseils particuliers qu'il auoit à tenir avec certains confidens, & declara pour dix ou douze iours de suite, ce qu'il auoit affaire. Et ayant veu dès le Dimanche l'orage commencer, sa ioye & son orgueil redoubla en forte, que le Cardinal l'ayant enuoyé conuier de passer à son logis auant d'aller chez le Roy, il s'en excusa, pour auoir pris medecine: & neantmoins le Cardinal arriuant à

Luxembourg, où la Reine logeoit, il le trouua dans vn petit cabinet seul, & lui dit seulement ! Ho, Monsieur, vous voila ! & vous disiez que vous estiez malade ? & passant outre, s'auançoit pour parler au Roy. Et lui voyant tant d'allees & venues, commença avec vn soufrire dedaigneux de demander à vn, qu'il fit seoir aupres de lui, qu'est-ceci ? il y a quelque chose : dittes moy que c'est ? pensant lors en son ame auoir la victoire entiere, ce qu'il creut mieux encor, lors qu'il sceut les discours tenus au Cardinal, qu'il creut estre sans ressource, quand il le vit partir, & qu'on luy commanda d'aller à Versailles, pour selon son aduis, prendre possession de l'Empire ; mais quand il y fut arriué, & qu'on le logea à Glatigny, & le Cardinal dans le Chasteau, alors il cogneut qu'il estoit bien loin de son compte, qu'il auoit à faire à gens plus fins que luy, & qu'il estoit perdu. Ce qui l'obligea d'escrire cette belle lettre qu'il donna le lendemain à Lomenie qui luy vint demander les Seaux, par laquelle il donnoit, comme Harlequin congé à son Maistre.

Par le Corbieu, voila vn mauuais homme, dit le President Ianin, & qui a vsé en tout cela d'une grande perfidie ; *Perfidia tantum incommodi humano generi adferi, quantum salutis bona fides praestat.* Dit le Garde des Seaux du Vair, s'estonnant comment le Cardinal de Richelieu auoit procuré tant d'honneur à cet homme. Et moy encores plus, dit le Roy, qui me fait bien rabatre de la bonne opinion que i'auois de luy. Sire, ne le prenez pas là, dit le President Ianin ; les plus fins sont attrapez par ces papelards, qui font les chatemites, & sous pretexte de deuotion



vous donnent de la griffe. Et nostre Seigneur ne nous aduertit-il pas de nous garder de ces *loups qui viennent avec des peaux de brebis*? Ces paroles signifient le peril qu'il y a en telles gens, & que pour s'en garantir il ne falloit pas vn conseil moindre que celui de Iesus-Christ, lequel fut aussi vendu par vn de ceux qu'il auoit choisis: & comme il sçauoit bien qu'il conspiroit contre luy; aussi le Cardinal sçauoit, il y a deux ans & plus, ses menées: mais sa patience & sa bonté, à l'imitation de son Maistre, luy faisoient dissimuler, esperant qu'il s'amenderoit: & le Roy mesme declara à Messieurs du Parlement, qu'il l'eust chassé il y a long temps, sans luy.

De mauuais œuf, mauuais Corbeau, dit le Cardinal du Perron. Que pouuoit-on esperer en la vieillesse d'un homme, de qui la ieunesse a esté passionnée contre l'Estat? J'ay aimé le Cardinal de Richelieu comme moy-mesme, n'ayant iamais cogneu de son aage, aucun qui eust vn genie si puissant pour l'Estat, ny si fort contre luy, d'auoir choisi cét homme pour amy, sans consulter le vray original des bons François, Le President de Thou, qui escriuant l'emprisonnement du President de Harlay, que voila grondant, pensant qu'on luy demande audience, met que Bussi estoit chef de cette execution; *Stipante Marillaco, & alius, cruenta religione imbutis*. Ouy, repliqua Teuin, mais il n'a pas mis la peur qu'il me fit, quand à la mesme heure venant dans la cinquiesme Chambre des Enquestes, de laquelle i'estois, ie me cachay sous des fagots aupres de la Beuette, & l'entendois iurant le nom de Dieu le poignard à la gorge de Maistre Pierre nostre

Beuuetier, le menaçant de le tuer, s'il ne luy disoit où i'estois, & bien me prit qu'il ne me decela pas, & à Fortia, d'auoir bonne iambes pour s'enfuir, car il luy en vouloit aussi bien qu'à moy, & s'en est tellement souuenu, qu'il ne l'a iamais voulu voir au visage depuis qu'il fut esleué en ses dignitez, ce le representant tousiours avec la furie de ce iour-là, maugreant & reniant Dieu comme il faisoit.

Il faut oublier le passé, dit le Cardinal de Berulle, & n'y songer plus: c'est vn bon homme & pieux, qui ne blasphema iamais. Il l'auroit mieux excusé, dit Seruin à l'oreille de Gillot, s'il eust reparti comme le Cardinal de Richelieu à son Capitaine des Gardes, qui se plaignoit d'un Prelat, de ce que sur vn refus qu'il luy auoit fait, il auoit aussi iuré le nom de Dieu, vous vous trompez, repliqua-il, Iesus, & Dieu, c'est la mesme chose, il a seulement pris l'un pour l'autre: & puis esleuant sa voix, il dit, Monsieur, pourrez-vous nier que cét homme n'aye esté vn des plus grands ennemis de nos deux derniers Rois?

Ha! Monsieur estes vous-là, dit le Cardinal? Vous estes suspect en cette cause, car vous n'avez iamais esté d'un mesme aduis sur vos priuileges de l'Eglise Gallicane que vous estendiez vn peu plus qu'il ne falloit, & sur vostre *Sanctum seculare*, que vous tiriez de saint Paul, par les cheueux, pour faire nos Rois Papes: & puis il vous a vn peu testonné sur vos conclusions que vous auez prises contre certains liures, où il vous lauoit bien la teste. Monsieur, dit Seruin, j'ay tousiours esté bon François, & me suis volontiers opposé aux entreprises faites contre la Couronne. C'est pourquoy il escriuoit contre moy, & qu'il fit imprimer son pernicieux



Examen, où il assuiettit la Royauté sous d'autres puissances suiuant les anciennes maximes de quatre-vingt neuf, qui ont engendré tant de malheurs à la France & lesquelles i'ay tousiours combatues comme damnables & contraires à la seureté des Estats. Non que i'aye voulu oster les Rois du bercail de l'Eglise, & les rendre Pasteurs au lieu de brebis: mais bien ay-ie tousiours dit, qu'il falloit de grandes considerations deuant que de venir aux excommunications, à cause du rang qu'ils tenoient, & des consequences perilleuses qui s'en pouuoient ensuiure: mais que toutesfois si la necessité force d'en venir là, que pourtant ils ne doiuent pas perdre leur bien ni la fidelité & obeissance de leurs suiects. Je prendrai Monsieur Gillot pour tesmoin de ma conscience, que i'ay tousiours eu nette sur cette matiere, aussi bien que luy sur celle du Concile de Trente, lequel il n'a pas eu dessein d'invalider, comme on lui a imputé: mais seulement à vous faire voir la disposition du siecle de son temps, qui souspiroit vne bonne reformation, & sur tout d'oster le Celibat & le Careme, comme contraires au genre humain.

Il est tousiours luy mesme, dit le Cardinal, diuagant & sautant d'une matiere à l'autre, Vous souuenez-vous, quand vous plaidiez la cause d'une femme qui auoit enleué son mari de la potence, que vostre conclusion fut contre le Cardinal du Perron, que le Concile estoit par dessus le Pape? Surquoi Serulin s'eschauffant dit: Je reprendrai mon discours, & prouuerai disertement ce que i'ay dit, & nul ne meniera qu'il n'aye signé le serment horrible qui se fit contre Henri troisieme,



\* Le 19.  
Fevrier  
1589.

qu'aucuns afferment auoir fait de son propre sang, & qu'il estoit de ce conseil, duquel Monsieur de Neuers a dit, il y a quarante ans \*, Ils se resolurent de forger vn Conseil à Paris de quelques personnes choisies à leur poste & deuotion, pour ordonner & disposer des affaires du Royaume ainsi que bon leur sembleroit. Ils monterent dans l'establissement de cinquante-quatre personnes, dont ils le composerent, qu'ils ne se soucioient d'aucune capacité, suffisance & experience en eux, pourueu qu'ils y trouuassent de la passion, de l'auenglement, & de la temerité: tellement que les plus mutins & les plus ennemis de la Maiesté, leur furent les plus capables. Aussi firent-ils à leur entree vn trait digne de notables Conseillers d'Estat, en quoy leur ignorance ne parut pas moins que leur passion, & la seruitude qu'ils auoient deuouee à celuy qui les auoit créez, &c. A quoy, au lieu d'auoir esgard apres leur sottise & imaginaire degradation de la personne du feu Roy, (auparuant mesme que sa Saincteté y eust touché) & de proclamer promptement vn autre Roy, ou à tout le moins appeller vn Prince du Sang pour exercer cette Regence: ce beau Conseil, fait de routes pieces, comme vne botte de foin de toutes sortes d'herbes, &c. signé de Marillac, & pour Greffier Senault. Par cette allegation vous voyez que ie n'ay pas tort de hayr le nom de cet homme, & quand vous entendrez ce qui suit, vous mesmes le condamnerez \*. Car depuis on ne cessa iamais de pourfuiure le Pape avec mille impostures, & sur tout des rodomontades, que le Roy \* estoit accablé, & que toutes les grandes Villes & les Parlements, grande partie des Officiers de la Couronne, Capitaines & Seigneurs, & entre tous le Clergé, estoient vnis avec eux. Qui fut cause de le faire precipiter à publier le Monitoire contre le Roy

\* Discours  
de Monsieur  
de Neuers.  
\* Henry  
II.  
Le Monitoi-  
re fut public  
le 22.  
2. Iuin à  
Paris, le



cuidant qu'il fust perdu, qui causa vn grand malheur. S'ils en fussent demeurez-là, le mal eust esté moindre. Mais voulant esteindre toute la maison Royale, ils poussèrent l'affaire tousiours avec la mesme fureur contre la personne de vostre Majesté, & obtindrent vn Monitoire plein d'horreur, vous priuant de vostre Royaume de Nauarre, dignitez & charges, vous declarant indigne, inhabile, & incapable de posseder aucunes Seigneuries, & specialement le royaume de France, & la publication en fut faite à Nostre Dame, où Michel de Marillac s'y trouue encor signé: & par cette malheureuse fulmination on vouloit estouffer dans vos reins ce grand Roy vostre fils, qui est auiourd'huy le plus renommé Prince de la terre, par les grandes actions qu'il a faites contre tous ceux qui ont entrepris contre luy: & de plus s'ensuiuit le peril que vous courutes depuis à Paris.

Vous m'estonnez de tout ce que vous me dites, dit le Roy, ne pouuant conceuoir en mon esprit, comment cela ne s'est point sceu plustost, & si l'on l'a sceu, comment on l'a tant souffert. Et le Parlement comment viuoit il avec luy? Mal, dit le premier President Champigny. Car comme le President le Iay fut député vne fois vers la Royne, pour luy faire des remonstrances sur le Code Micheau, lequel ie diray par parenthese, que quand il fut rapporté au Palais en la presence du Roy, parlant des Estats composez (disoit-il) de l'Eglise, Iustice, Noblesse & tiers Estat, il pensoit par cette impertinente nouueauté de proposer quatre Corps au lieu de trois, dont les anciennnes assemblees dans le royaume ont tousiours esté composees, & met-

9. Iuillet A  
Chartres, &  
le dernier de  
Iuillet cette  
furie d'En-  
fer partit de  
Paris pour  
son cruel  
parricide.

tant la Iustice deuant la Noblesse establir, vn ordre qui seroit comme enregistré en cette compagnie qu'il pensoit obliger par là. Mais le fruit qu'il en tira, fut, qu'on se mocqua de luy, & que s'estant eschauffé contre la harangue, il disoit, Vous m'attaquez, ie vous entends bien. Il est bien aisé, dit le President, car ie parle bon François: luy voulant donner par cette attaque sourde vne atteinte, qui signifioit qu'il ne le tenoit pas pour tel.

De quel Code voulez-vous parler dit le Roy? A-on adiousté quelque chose aux anciennes Ordonnances? Il me semble qu'elles estoient assez claires, & qu'il ne falloit que les bien observer. Qu'en dites vous Monsieur de Sillery? Lequel respond: Sire, ie vous assure que ie n'y ay peu rien comprendre, & que luy mesme n'a pas entendu ce qu'il a voulu dire, se voyant par plusieurs articles qu'il a eu dessein de renuerser tout ce qui estoit du passé, pour le reduire sous son caprice sans raison, faisant quasi par tout des ouuertes à ne l'observer point. Toutes les anciennes Ordonnances estoient pour authoriser, faire reuerer & honorer la personne du Roy, estant porté en icelles: *remettant toutes les difficultez, contrauentions, & oppositions, à Nous, pour en ordonner*, &c. où celles-ci euoquent tout au Conseil pour en deliberer & ordonner comme on verra bon estre: qui est en vn mot attirer à soy toute l'autorité, & faire vn Roy de cire, qui ne pourroit agir de pleine puissance Royale sans l'aide de son Seau: qui est bien loin de la façon respectueuse, que ceux qui ont possédé nos charges ont tousiours rendu aux Rois. Monsieur de Bellievre ne viuoit pas ainsi avec vostre Maiesté.

Alors



Alois l'Euesque d'Orleans quittant son Tertullien, qui l'auoit mis tout en eau, prit la parole & dit: Vous n'avez pas tout dit de ce beau Code, lequel non seulement estoit contre la Majesté des Rois, mais encore contenoit des heresies, pour lesquelles aucuns du Clergé avec moy luy declarasmes, que s'il n'y remedioit, nous l'excommunierions avec son liurè: & entr'autres, nous luy montrasmes l'article du Concile de Trente, (lequel bien que non receu en la police, pour la foy il l'est par tout le monde) qui defend les mariages clandestins; luy veut que les Parlements les declarent nuls, par vne attribution de pouuoir iuger des Sacrements, & faire plus que le Concile qui les defend bien, mais ne les annulle pas: car *quod Deus coniunxit homo non separet*. Il demeura muet, s'excusa sur son intention, qu'il affermoit n'auoir iamais eu mauuaise, & qu'il y falloit remedier par l'examen qui en seroit fait fort proprement. Surquoy fut ordonné le sieur de Bullion Commissaire pour cét effect, qui n'a pas fait de difficulté d'apostiller ces beaux articles, où l'on voit qu'il prononce. Cettuy-cy sera osté: cettuy-là corrigé: on adioustera tels mots: on changera ceux-cy. En sorte que si on eust prononcé sur tous, on n'en eust lassé aucun.

C'estoit la precipitation, dit le President de Verdun, *ore oborto*, qui luy faisoit tout entreprendre de sa teste, ne voulant rien communiquer avec personne, tant il auoit bonne opinion de luy, croyant pouuoir tout faire sans estre blasmé. Et qui ne s'estonna vn iour, le Roy allant au Parlement, de luy voir porter huit Edits, qu'il n'eut pas le loisir d'acheuer à son logis, & les alla sceller sur l'Autel de



la sainte Chapelle, qui sembloit ne deuoir iamais estre purifié de telle profanation que par le feu qui y a esté mis depuis. Pour monstrier avec combien peu de consideration il faisoit les affaires, qu'il conduisoit plustost avec impetuosité qu'avec raison. Et si ces Edicts, qui se pouuoient tous reduire en trois ou quatre, eussent esté couchez en bonne forme, le Roy en eust eu contentement, & eust empesché beaucoup de crieries : Par où l'on peut iuger de la difference de sçauoir bien ou mal faire les choses. Il vouloit prendre seance par dessus moy au Parlement, quand il y viendrait seul : Ie l'en eusse bien empesché, comme i'ay fait voir par la feüille que i'ay fait imprimer : & quoy que Ribier puisse auoir escrit au contraire, ie me serois plustost fait tourner la bouche de l'autre costé, que de luy auoir cédé.

C'est parler en homme de cœur, dit l'Aduocat Arnaud : Mais puis que vous luy en voulez, comment n'auéz-vous point sceu les discours que nous faisoit Monsieur des Landes, de son entree au Parlement avec le Roy, pour presenter ce ridicule Code, & à fin de persuader & obliger la Cour à le recevoir ? Il commença sa harangue par la maladie du Roy, les secours donnez en Ré, & la continua par la deffaite de l'armée Angloise, du retour des deux autres armées, sans aucun effet, du siege de la Rochelle, & de la circonuolation qui y fut faite, du siege de Tyr par Alexandre, de la puissance de la Mer qui ruyna sa Digue, de l'antiquité des vaisseaux à feu mentionnez dans Quinte-Curce, pour monstrier que les Rochelois se ventoiët à tort d'en estre les auteurs, de l'Ordonnance de Theodose



& Honorius touchant le Nil, du miserable estat de la Rochelle quand elle fut prise, du Traicté qu'elle auoit fait avec l'Anglois, de la ruine de Bizante par l'Empereur Seuerus, de Limoges par Charlemagne, des gardes du Roy entrees dās la Rochelle plustost comme troupes auxiliaires, que conquerantes. Ne sont-ce pas preuues pertinentes pour l'autorité de son Code? Et recognoissant trop tard son impertinence par la mocquerie qu'il apperceust qu'on faisoit de luy, il vſa de menaces par vne infinité d'exemples hors de propos pour faire peur, & en vn mot, dire qu'il estoit inuſte & ridicule, non receuable que par la force. Aussi a-il esté si mal receu, que s'il y auoit Aduocat si hardy de le citer, il seroit sifflé par la compagnie. Chacun conclud, qu'à son humeur tout sembloit possible, & qu'on ne s'en estonnoit, veu qu'il n'auoit point eu de honte de publier & aduouer la traduction, & rimmes de ses Pſeaumes, qui auroient fait rougir tout autre que luy. Alors le Roy imposa silence à tous, voulant ſçauoir quelle auoit esté l'issue de l'affaire.

Que le iour de la Saint Martin (lequel Botru nomma ingenieusement la iournee des Duppes) respōd Villeroy, plusieurs croyoient que le Cardinal fust par terre; & les ennemis s'en resiouyſſans, les gens de bien en souſpiroient, & les Huguenots mesme se desesperoient de cēt accident, parce que l'ayāt trouué fidelle à leur maintenir ce que le Roy leur auoit promis, ils craignoient de retomber dās les maux dont ils venoient de sortir: Et que comme on taschoit de renuerſer l'Edict de Paix qu'il auoit conseillé, ils n'esperoient que toutes sortes de mise-

res par son esloignement. C'est pourquoy ils s'affligeoient fort du bruit qui en courut. Et comme le lendemain on veid esclater trois grâdes nouvelles, La cullebuté du Garde des Seaux, l'establissement en sa place de Chasteauneuf, & le Iay fait premier President, tout le mōde changea de visage, les gais du iour precedent deuindrent melancholiques, & les affligez recommencerent à rire.

Cela est chose ordinaire à la Cour, dit le Roy, & i'ay veu milles choses semblables: mais cependant voila vn bon choix: Et Dieu vueille que tous ceux qui se feront à l'aduenir soient semblables: l'Estat en ira de mieux en mieux. Le President le Iay fera bien cette charge. Pour Chasteau-neuf, il est de ma nourriture. Monsieur de Villeroy, vous scauez que ie vous ay dit, il y a long temps, qu'il prendroit vn iour la place de son grand pere, de son oncle, & la vostre: & dès que ie l'enuoyay en Hollande, pour estre conjoint avec le President Ianin dans le Traicté de la Treve qui se faisoit, j'en eus la pensee; sur ce que m'estant venu trouuer vne fois sur ce sujet, ie cognus qu'il seroit propre aux affaires; & le mesme President me l'a tousiours fort estimé. Ce n'est pas à tort, respond ce bon vieillard, comme il se void par les continuels emplois qu'il a eus depuis: & se peut dire, que iamais hommen'est entré en sa place, qui aye tant negocié dās les pays estranges, Et Bethlen Gabor le remarqua fort bien en son Ambassade d'Hongrie avec le Duc d'Angoulesme. Il a esté Ambassadeur en Flādre, en Suisse, Grisons, Venise, Angleterre, Bellereyre, qui brauement mit l'espee à la main dans les



Grifons, contre l'Ambassadeur d'Espagne qui le vouloit preceder; & de Sillery, qui auoit aussi veu les Pays estranges, n'ont pas mal entendu leurs charges, l'un & l'autre ayans à la verité long temps outre cela esté employez dans les plus grandes negotiations du Royaume: mais tous les autres, qui ont eu credit, n'auoient iamais quitté le Palais, comme Poyet & du Prat. Pour du Bourg, il auoit aussi fort voyagé, respond le President, en riant, car il venoit de Surie quand il fut fait Chancelier. Et ce qui n'empire pas les conditions de cestuy-cy, ce sont deux ou trois annees qu'il a eu d'employ & de grande priuauté avec le Cardinal de Richelieu, qui luy ont appris des choses qu'on m'a dit, qu'il confesse lui mesme lui auoir donné de grâdes lumieres, qui luy auoient esté incogneuës iusques alors.

Tout ce que vous dites est vray, dit Villeroy: Et i'adjousteray encor ce qu'on escrit, & que ie trouue fort à son honneur & à celuy de son predecesseur, assauoir les lettres de sa charge, portans, *Que le Roy n'ayant peu auoir plus long-temps agreables les ser- uices du sieur de Marillac en la charge de Garde des Seaux* (notez cela) *ayant à la remplir de quelque personnage, auquel les qualitez que requiert un si grand office se trou- uassent au degré de vertu qu'il conuient, afin que nous en ayons non seulement satisfaction, mais nos peuples aussi, & que de son equité & droicteure ils puissent attendre & re- cevoir iustice aux plaintes qu'ils auront à nous faire; & qu'il se fust acquis vne telle experience aux affaires d'Estat, qu'en celles qui se presenteront, nous puissions estre assistez de son conseil.* Ce que n'ayant trouué en personne si emi- nemment, qu'en nostre tres-cher & feal. &c. lequel nourry en nostre Parlement & employé dès sa plus tendre ieunes-



se, dès le Regne de feu nostre tres honoré Seigneur & Pere, en diuers Ambassades, & depuis par nous employé aux plus grandes affaires qui se sont presentees, soit au dedans ou au dehors de nostre Royaume ausquelles il nous a donné des preuues de sa capacité & fidelité, s'y estant acquis le renom qui conuient à un Garde des Seaux, & l'experience pour dignement nous servir; Nous n'auons peu ietter les yeux que sur luy, esperant que son soin & sa vigilance nous aydera à restablir nostre Royaume en exemple à la posterité: ce qui retournera à la gloire de celuy qui nous a tousiours conuert de ses aïdes.

Voyez, dit le Roy, son oncle le Marechal de la Chastre qui pleure de ioye. Qu'on appelle le Garde des Seaux de Moruillier, auquel ce bon homme disoit que son neveu Charles ressembleroit, à fin qu'il aye sa part de la nouuelle. Pour des gens d'espee qui entrent au Conseil, le Marechal de Schöberg en est tousiours, à ce qu'on m'a dit. C'est vn homme sage dès le berceau, & que i'ay tousiours aymé. Il y a ie ne sçay quoy d'escrit sur la face des hommes, qui fait voir s'ils doiuent estre quelque chose ou non, & cela ie l'ay leu sur la sienne, & ie ne me suis iamais gueres trompé en mes iugemens. Et qui a les finances à cette heure? Le Marquis d'Effiat; Sire, dit Villeroy: & lors qu'on croyoit qu'il fut sans ressource, apres tant de despences qu'il a soustenuës depuis qu'il est en charge, il a si bien pris ses mesures, qu'il a entretenu cette guerre, & en rapporte de l'argent, sans auoir rien entamé sur l'aduanee de l'annee prochaine dans pas vne des Receptes generales: qui fait voir qu'on y procede fidellement. Aussi en a-il receu cét honneur, que fut l'instance qu'il a fait au Roy, d'estre



deschargé d'un si grand fardeau, offrant son conseil & son assistance à qui que ce fust, qui fust nommé de sa Majesté pour en faire l'exercice, il luy a commandé expressement de continuer sa fonction, comme le iugeant si necessaire en cette administration, qu'il croyoit n'y en pouvoir commettre d'autre sans un grand interest en ses affaires; & à Vigliane, où les troupes du Duc de Sauoye furent bien frottées par des gens plus foibles qu'elles n'estoient, & encores à Carignan, où il monstra en l'un & en l'autre, qu'il n'estoit pas moins bon pour combattre, que pour le maniement des finances; de quoy s'est ensuiuy, que pour marque de sa vertu il a esté fait Marechal de France.

N'y a-il plus de robbe longue dans les affaires, demanda le Roy? Bullion y est, Sire, respond Villeroy, & y seruira tres-bien, car ie l'ay tousiours cogneu accort & iudicieux. A qui parlez-vous, dit le Roy? N'est-ce pas encor un de ceux de qui ie me seruois le plus? Le President Ianin n'en sera pas marry. Non, Sire, respondit-il, ie m'accommodoys fort bien avec luy, & auions accoustumé de rire souuent ensemble quand nous estions de loisir, & principalement quand ie luy disois ce demy vers, *Antrum immane petit* Ie vous entends, dit le Roy, & me faites souuenir du *Dio ne me garde de ma femme*, qui ne fut mal à propos.

Et qui a les despêches estrangeres? Boutillier, Sire, dit Villeroy; & les fera bien: car il a bon sens, fidelité & secret, & de plus dressé de la main du Cardinal, qui ne luy aura pas esté vne mauuaise leçon. Il est fils, dit le Roy, d'un homme de bien, que i'ay cogneu sincere, & en voulois faire un Presidēt,



si'eusse vescu dauantage. Cela me fait bien esperer de mon fils, de ce qu'il ne prend pas le conseil de Roboan, qui chassa tous ceux que son pere ay-moit, pour se ietter entre les mains des gens nou-ueaux & inexperimentez, qui le perdirēt. Il paroist par là que ie ne faisois pas mal, puis qu'on suit mes errés, & qu'on prend tous ceux desquels ie me suis serui, ou que i'ai aimez pour la cōduite des affaires.

Mais ne dit-on rien dans ces depeschés du frere de Marillac? Ouy, Sire, dit Villeroy l'histoire en est longue, & tout le monde le blasme de son ingratitude. Car vostre Majesté sçait bien qu'elle n'en auoit iamais fait d'estat depuis le fait de Caboché, & qu'une fois dînant chez Bastien, disant à tout plein de Seigneurs, Disons mes enfans, mettez vous à table avec moi, il s'y voulut mettre avec les autres, & vous le fistes leuer, disant, que par vos enfans vous n'entendiez pas ceux de sa sorte: & le chassastes du Bac à Saint Germain, disant, que vous ne vouliez point dans vostre compagnie de gens qui luy ressemblassent, pour faire voir que vous ne l'estimiez pas: & a vescu ainsi, iusques à ce que le Cardinal de Richelieu luy procura la charge d'Ayde de Camp dans les armées contre les Princes, & puis la charge de Commissaire general de l'armée, en suite la Lieutenance de la Compagnie des Gens-d'armes de la Roynie Mere, avec la recompense. Au siege de saint Iean il fut fait par son intercession Marechal de Camp, & luy fit donner le Gouuernement de Verdun, la Lieutenance dans les païs, & les moyens de faire bastir vne des belles Citadelles qui soit en France: Et pour conclusion fut fait Marechal de France à Priuas, avec

des



des peines indicibles, le Roy vostre fils y contredisant, se  
 faschant de refuser le Cardinal qui l'en sollicitoit ; &  
 neantmoins apres l'auoir promis, il fut deux heures sans  
 s'y pouuoir resoudre : Et comme il eut fait le serment,  
 deux iours apres, ayant sujet d'escrire au Cardinal, il le  
 traitta simplement *de vostre bien humble seruiteur* : pour  
 monstrier que les honneurs bien meritez auoient en vn  
 instant changé ses coustumes. Apres il fut Lieutenant  
 General d'armee seul en Champagne, où il n'a pas mal  
 fait ses affaires, à ce qu'on dit, & pour recompense de ce  
 que dessus, lui & son frere ont voulu ruiner l'autheur de  
 leur bonne fortune, comme il ne peut s'empescher de le  
 tesmoigner partant de Verdun, disant, Il y a long temps  
 que mon frere & moy luittons contre le Cardinal, mais  
 i'espere qu'à ce coup nous le porterons par terre : & son  
 frere a esté veu sombre & morne dans tous les bons pro-  
 grez d'Italie, comme ces Medecins, quand ils ont iugé  
 quelqu'un à la mort, pour la reputation se desesperent  
 s'il guerit. Et fut remarqué par plusieurs personnes vne  
 ioye incroyable, quand il sceut dans le Sceau, la prise de  
 Mantouë, qui lui remplit le visage de gayeté lumineu-  
 se, & avec vn *Nous en verrons bien d'autres. Et si on m'eust  
 creu !* Il appella tous les Secretaires qui auoient des let-  
 tres rebutees, & les fit apporter, & les seella toutes, pour  
 par ce moyen faire les feux de ioye d'une si bonne nou-  
 uelle, estant de cetté humeur, de vouloir auoir vne iusti-  
 ce & vne raison à sa mode : car ce qu'il faisoit n'estoit pas  
 parce qu'il sembloit ainsi aux autres ; mais parce qu'il  
 estoit porté à cela par sa fantaisie, n'ayant iamais esté de  
 l'opinion de la compagnie, mais voulu tousiours que  
 tout le monde fut de la sienne, au surplus deuenue si fier,  
 qu'il sembloit que comme vn lion il deust deuorer tout  
 le monde, offensant vn chacun doublement du refus & de



la maniere qu'il y apportoit, montrant bien qu'il auoit mal estudié la Pratique de Messieurs de Chiuerny & de Sillery, qui adoucissoient les mescontentemens de ceux qui perdoient leurs causes, par des paroles douces & civiles, qui empeschoient le desespoir, que donnoit certui-cy, deuenü inaccessible à tous ceux du Conseil mesme, se tenant souuent renfermé, escriuant tousiours de mauuais memoires, & faisant des liures, qui reüssissoient si mal, que Toirax en fit pendre vn. publiquement & brusler apres pour la fausse monnoye qui estoit contenue dedäs: & ce qui estoit depis, c'est qu'il ne rendoit point iustice, estant perpetuellement dans les cabinets de la Roine, où il auoit cetteruze d'entrer de bon matin, pour faire voir qu'il auoit grand credit: & comme on le voulut descou-urir, on trouuoit qu'il entretenoit deux ou trois heures les femmes de chambre: & puis quand on l'appelloit, il se trouuoit qu'il n'aucit rien à dire, qui en vn autre temps l'eust fait trouuer importun & fascheux, ne laissant pas de continuer pour payer le monde de ce lustre, qu'il manioit les cabinets à sa mode, faisant plus d'estat d'un garçon de chiens, que d'un Maistre des Requestes: & cependant qu'il s'amusoit à ces bagatelles, les pauvres parties languissoient, le maudissant de ne pouuoir estre expediees, & demeurer ruinees en la poursuite de leurs affaires: Et cela n'est rien au prix de son proceder, quand le Roy s'en alla à Saint Iean de Morienne, dissuadant tous ceux qu'il rencontroit de le suiure, luy qui s'exposoit en toutes sortes d'incommoditez, pour tesmoigner qui n'a rien plus cher que l'honneur de son Estat: & cet homme avec vne tendresse de crocodile, protestoient publiquement contre ce conseil, duquel il sommoit vn chacun de se souuenir qu'il nel'auoit point donné, augurant toutes sortes de mauuais presages pour en descourager tout le



monde, & au retour il se mit à genoux deuant le Roy, testimoignant avec vnn visage fumant de zele, le contentement qu'il auoit de le voir eschapé d'vn lieu où il luy pouuoit arriuer toutes sortes de defastres, & avec cette ioye spirituelle on remarqua, qu'en la maladie du Roy, où tout le monde fondoit en larmes, il n'en versa iamais vne seule.

Fiez-vous en ces hypocrites, dit le President Ianin. Par le Corbieu ie les ay tousiours haïs. N'en parlons plus, dit le Roy, ie veux sçauoir des nouuelles d'Italie: Ie vois le Strigio, qui nous en dira. Et bien Marquis, vous auez perdu Mantouë? comment cela, est-il arriué? Sire, respondit le Marquis, *Sic erat infans*: car avec tant soit peu de resolution on pouuoit eüiter ce malheur. Mais comme le Duc auoit naturellement le don d'incertitude au choix des choses qui luy estoient necessaires, il m'a rendu prophete à mon tres-grand regret, luy ayant plusieurs fois dit, qu'il valoit mieux auoir vn Estat gasté que perdu, qu'il falloit quitter toute conuiuence, pour aller au solide & au certain, ou autrement qu'il se verroit bien tost despoüillé de ses Estats. Ses peuples luy estoient mal affectionnez, & il pensoit avec le temps les gagner, & en les espargnant il s'est perdu avec eux. S'il eust sceu se seruir des biens qui estoient dans sa ville, leuer des hommes, faire venir des François de l'armee Venitienne, qu'il craignoit & apprehendoit plus que les Allemãs pour son malheur, il auroit eüité beaucoup de maux: & avec cent mil escus qu'il pouuoit prendre sur les siens avec raison, il auroit eüité ( chose prodigieuse ) vn sac de cinq millions d'or, & la ruine entiere de tout son peuple avec la sienne, causee par ces furieux animaux qui ont figure d'homme, mais tout à fait bestiaux, ayans foulé aux pieds la religion, & tout ce qu'il y a de plus sacré, pour le prostituer à leurs furieux appetits; quia fait voir



le zele de ceux qui les ont enuoyez tous heretiques, à fin de rendre leur crime plus grand deuant Dieu, qui tost ou tard leur demandera compte de tant de desordres, dont ils sont les auteurs, comme du sang d'un million de Vierges, violees & egorgees, avec vne barbarie sans exemple.

Et les Princes d'Italie qu'ont il dit à cela ? dit le Roy. Rien, Sire, respondit-il. Car Florence est tout Espagnol, tant que la Mere & le Comte d'Orse viurent : apres, ie n'en respondrois pas, si on garde vne entree en Italie, car ie sçay qu'il ayme fort vostre fils. Pour Parme, c'est vn ieune homme qui n'oseroit respirer, iusques à ce qu'il voye que les François ayent les Alpes derriere eux : en ce cas là, il n'est pas hors d'esperance de pouuoir estre aussi bon François que le Duc de Castres, de sa Maison, l'a esté pour vn temps.

Et les Venitiens, dit le Roy ? Ils ont voulu hors de temps exercer leur prudence, respond le Marquis. Car pour ne se vouloir pas declarer, comme ils deuoient, voyant les François en Italie, autant pour leur liberté que pour celle des autres, ils ont laissé perdre Mantouë, pouuant quatre mois auparauant chasser les Allemans d'Italie, qui ont esté long temps foibles : & comme ils ont voulu temporiser, ils ont auancé leur ruine : car s'estans depuis fortifiez de nouvelles troupes, ils furent faire vne furieuse attaque à Maringo & Villebonne, où les bons Seigneurs ne se trouuans pas respectez comme à Venise, ils furent contraints de faire retraicte en telle sorte, que qui n'eust sceu ce qu'ils faisoient, certes on eust dit qu'ils eussent fuy : & le malheur fut, que deux mille cheuaux qu'ils auoient voyans venir en ordre les Allemans, qui n'estoient que mille, poursuiuans leur victoire, ne s'aiderent iamais de les charger, pour n'auoir pas eu, disoient



ils, le commandement, lequel ils allerent chercher à toute bride à Valaize: où ayans assemblé leur conseil, ils suiuirent l'aduis du Comte Scot, lequel, disoit-il, *So bonche sara vituperoso ma pure sara utile à Serenissima Republica*: lequel fut de quitter la place, & à sauue qui peut, gagner Pesquiere. Ce qui fut brauement executé, en attendant avec impatience les diuertissements du Turc en Hongrie, pour occuper les Allemans, & diuertir ces desseins d'hommes bestiaux, qui ne laissent nulle meschanceté à commettre.

Mon fils a pris bon conseil dans la resolution qu'il a faite, dit le Roy: car veu ce que i'entends dire, Cazal estoit pris avec Mantouë, & les Grisons. Et cela estoit le chemin, à quoy les Espagnols tendent, il y a long temps, d'v-nir l'Allemagne à l'Italie, auquel cas tous les autres Princes estoient en grand hazard: & m'estonne que pour s'y opposer toute la terre ne s'vnit avec mon fils, qui a eu de grandes raisons d'entreprendre cette guerre, avec laquelle il a cogneu & preuenu le mal: & sans laquelle les Venitiens eussent couru grande fortune (s'ils n'eussent point eu d'amis armez) d'estre reduits à la pitoyable harangue qu'ils firent à Maximilian: N'y ayant point de doute qu'ils pouuoient estre despoüillez de toutes leurs places en terre ferme: & leur grande ville, priuee du pain qu'ils en reçoient, eust bien tost suiui le chemin des autres.

Qu'est deuenu ce braue General qui les a si bien seruis, & comment s'appelle-il? Saoredi, respond le Marquis, qui a esté demis de sa charge & emprisonné.

Le Roy soupirant du peu de preuoyance, qu'auoient eu les Italiens pour s'opposer aux maux qui les approchoient de si pres, voulut sçauoir ce qui auoit reüssi du Traicté de Ratisbonne. A quoy Villeroy respondit, que



plusieurs l'auoient trouué mauuais, pour lezele qu'ils auoient à la grandeur de l'Estat : & les autres, pour n'aimer pas la paix au-dehors, encores qu'ils eussent publié auparauant, qu'ils en brusloient d'enuie. Et ayant veu, n'y a pas long temps le Duc de Monteleon sous vn Ciprez tout pensif, il seroit bon de le faire approcher, car il est homme candide, qui dira franchement ce qu'il en peut auoir appris, n'estans pas chose bien expliquée dans les depesches que i'ay.

Alors ce Duc estant appelé, & enquis de ce qu'il en sçauoit, il tesmoigna que d'entrer en ces discours cela luy estoit douloureux, par vn profond soupir & vne grande melancholie qui luy en parut sur son visage, & refrognant ses sourcils dit au Roy : Sire, *Infandum iubes renouare dolorem*. Je me ressouuiens que du temps que i'estois en France, ie fus vn iour visiter le sieur Arnaud, ce fameux Aduocat, pour conferer avec luy sur les oppositions de Bourdillon en Piedmont, & les remonstrances du Duc de Neuers : pour sçauoir s'il auoit trouué assez de vigueur en l'vn, & de raison en l'autre. Je vis sur sa cheminee ce Distique,

*Versis lugebit Iberia fatiis.*

Mis à l'imitation de Virgile: par lequel ce Poëte celebre representoit vn Prince de la race de Priam, qui par vn don de prophetie, ou plustost par vne profonde science d'Estat, cognoissoit l'instabilité des choses humaines, consoloit Enee, en prédisant, que les destinees de la Grece, ennemie des Troyens, seroient en fin changees, & qu'on verroit vn iour le chastiment merité, qui se feroit par quelqu'vn de sa posterité. Surquoy dés-lors il me tomba dans l'esprit, que voyant tant de vertus en vostre fils dés sa ieunesse, il pourroit accomplir ce pronostic: & que depuis il s'estoit tousiours enquis du cours de sa vie



pour verifïer ſa creance : Et qu'ayant entretenu Collalto de ce qui ſe diſoit (quand il quitta la vie) de ce Traicté, dequoy il ſembloit que quelques vns des leur en auoient de la ioye, & autres ſ'en attriſtoient ; ie le priay inſtamment, comme bien informé qu'il pouuoit eſtre, de m'en dire ſon ſentiment. A quoy il me reſpondit d'Italien à Italien, comme conuenans d'inclination, de preferer ſagement la conſeruation de la vie à la vanité: Qu'il eſtoit vray, que depuis la priſe de Mantouë ( qui l'auoit chargé de deſpoüilles) ayant reſſenti que ſes poulmons ſe rempliſſoient tous les iours d'une plus grande defluxion, qui le faiſoient iuger qu'il eſtoit pres de la mort, il auoit penſé aux moyens de faire vne honneſte & ſeure retraicte, pour ſ'oſter de la foule, & des combats importuns à ſon humeur: qui l'auoit porté pluſieurs fois à ſupplier l'Empereur de luy donner congé : Et que ſi d'auenture le deſſein qu'il auoit n'eult eſté cogneu de tout le monde, & que la maladie ne l'eult ſi fort preſſé, il eult creu ne pouoir, ſans regret, voir que les François firent la paix les armes à la main, ſi celle de Ratiſbonne ne les eult mis hors de peine de conſulter, ſ'il eſtoit plus auantageux de ſ'expoſer au peril d'une bataille, que de laiſſer la campagne libre à leurs ennemis, qui ſ'approcherent ſi pres des retrenchements, que les Eſpagnols ne refulerent pas tant d'entreprendre de les en eſloigner pour la crainte de la mort, (car il n'y a point de doute qu'ils ne ſoient fort vail-lans) que pour le deſplaiſir qu'ils euſſent peu receuoir, en ſe retirant vn peu viſte, de faire tort à leur grauité. Et quant à luy qui regardoit le plus ſolide que l'apparence & le faſt des deſmarches des gens de guerre, il diſoit ſincerement, que puis que l'Empereur, faiſant la paix ſans attendre la reſponce d'Eſpagne, a teſmoigné qu'il vouloit preferer les intereſts qu'il a dans l'Allemagne pour la



Religion & l'Estat, aux entreprises peu heureuses des Gouverneurs de Milan, il est croyable, que cette Monarchie affectee par les Espagnols sur les autres peuples, sera bornee au Fort de Fuentes, & que par le secours de Casal ils doiuent auoir perdu l'esperance d'Italie, dont ils pensoient, suiuant l'exemple des Romains, estendre leurs limites au delà de la ligne qu'ils ont designée pour les conquestes de la terre, comme pour celles de la mer.

Dans ces discours de Collalto i'apperceus bien qu'il estoit tout chagrin, d'auoir si peu iouy du fruct de sa proye. Et comme il m'eut laissé, ie rencontray Villani, qui me donna vne grande relation de tout ce qui estoit sur le tapis au temps de son partement, enuoyee, à mon aduis, par quelque vn de l'autre monde, tres-bon Italien, mauuais Espagnol, & qui ne hait pas les François. Ie ne liray seulement que ce qui regarde ce dont vostre Majesté a voulu estre informee, qui est cōtenu en cet article.

Et quant au Traitté qui s'est fait en Allemagne, il me semble que c'est le prelude de la Comedie qui s'est jouée deuant Casal, laquelle est vne des rares pieces qui aye paru dans tous les siecles passez: estant chose assez plaisante & peu commune, de voir Mazarini sortir d'une trenchee à l'improuiste le chapeau à la main, & porter à toute bride la Paix aux François, qui venoient pour enfoncer le Camp tout en la mesme sorte, comme s'ils eussent couru au faquin: & de voir en suite les Chefs de l'armee Imperiale, & Espagnole s'auancer au grand pas hors de leur Camp, pour embrasser avec ioye les Chefs François, & tesmoigner leur zele Catholique, d'espargner le sang des Chrestiens. Ie sçay de bon lieu qu'en la Diete plusieurs personages diuers estoient montez sur le Theatre pour commēcer le ieu, & preparer l'attention des spectateurs: d'une part l'Empereur auoit protesté sans feintise sa bon-

ne



ne intention pour le repos public, & contraignant son naturel auoit rabroüé en cholere l'Ambassadeur d'Espagne, qui vouloit qu'on ne conclud chose quelconque, & que tout l'vniuers demeurast en suspens, pour attendre le retour de son courrier qui n'auoit, ordre de partir, qu'apres la prise tant desirée de Casal: comme si le premier mobile deuoit arrester son cours, & n'auoit point de mouuement sans les influences du Conseil de Madrid. D'ailleurs les Electeurs Catholiques estoient sur le point de passer pour fauteurs d'heresie, au iugement des Espagnols, parce qu'ils ne vouloient pas estre despoüillez par eux comme le Palatin, qu'ils sont prests toutesfois de releuer du ban de l'Empire, voire mesme de le canoniser, pourueu qu'il le laisse iouyr de ses biens, & que comme vn bon Chanoine, il se contented'vne pension reguliere, & feroient bien la mesme grace aux autres Princes, s'ils vouloient estre aussi simples & gens de bien que le Duc de Pomeranie, qui en beuuant laissa prendre son Estat au Vvalestin General de l'Armee Imperiale, & qu'ils abolissent la ligue Catholique, indigne de ce beau titre, puis qu'elle n'est qu'Allemande & non pas Espagnolle. Il est arriué pourtant que le contrecoup de tant de desseins est tombé sur le pauvre Vvalestin, lequel s'estant aduancé à Menighen, pour tourner teste vers l'Italie & la France, qu'il menaçoit de courir de gens de guerre, s'est trouué dans vne matinee demis de sa generalité, & s'en est retourné en Boheme pour contempler la vanité du monde, & mediter de plus pres, & au propre lieu, d'où le Palatin fut chassé en vn iour, que comme luy il auoit perdu en vne heure par ce bannissement la possession qu'il auoit prise de la Duché de Mechelbourg. L'Ambassadeur de France changea souuent de contenance: car au commencement il fit voir, que le Roy son Maistre ne s'estoit ia-

H



mais esloigné d'une Paix raisonnable, pour iustifier ses actions & son procedé. Mais comme il recogneut que les Espagnols trainoient les affaires en longueur, pour l'esperance qu'ils auoient de prendre Casal, trauaillez de plusieurs incommoditez, il tesmoigna publiquement, que s'ils ne se contentoient des conditions, desquelles on auoit parlé de part & d'autre en Italie, sans rien conclure par leurs tergiuersations & incertitudes, qu'il estoit resolu de s'en retourner: & se preparant pour cet effect tous les gens de bien l'arrestèrent, l'Empereur mesme, les Electeurs & le Nonce, le coniurans de considerer ensemble les moyens plus propres d'appaiser le cours de cette longue guerre, que le sang respandu dans vne bataille auroit dauantage allumee, comme l'huile ietee sur les charbons accroist de beaucoup leur ardeur.

Surquoy il se rencontra, que, comme souuent l'Espagne se sert de Religieux, il s'en trouua vn François, qui selon sa condition prit le party de la Paix, estant mestier de Moyne, & telles gens n'ayant rien à perdre, s'ils ont quelque talent de bonne intention & d'experience; ils hazardent quelquefois des conseils que d'autres n'oseroient tenter, comme a fait cettui-cy, qui sous son long chaperon & sa grosse corde a donné le Moine aux Espagnols en cette affaire, où il se trouue que le Roy de France a secouru Casal par force & sans peril, son armee n'ayant pas moins acquis de gloire par l'approche qu'elle a fait de ses ennemis, que si elle eust gagné la bataille. Et que les Ducs de Sauoye & de Mantoue peuuent esperer d'entrer dans leur bien. Mais comme le Roy Tres-Chretien a rehaussé d'une main son allié, & avec luy tous les amis de sa Couronne: de l'autre, il a tellement abaissé les Espagnols, qu'il semble les auoir conduits sur vn penchant, & estre en son pouuoir de les faire tourner au bas.



de la rouë de la fortune : estant aujourd'huy en estat d'estre l'arbitre des differents de la Chrestienté, pour l'intérest qu'ont tous les Princes de s'appuyer du costé où l'on voit regner la Iustice & la sincere protection des opprimez, pour se garantir des violences & des vsurpations, dont à mon grand regret, chacun se plaint, & que ie suis contraint d'auoüer par la force de la verité : ayant de nouveau sur le cœur le déplaisir, de voir que dans l'Italie il n'y a poin de borne à l'ambition des Espagnols, qui depuis six mois ont obtenu de l'Empereur, que les vrais heritiers de Piombin, place importante, pour le voisinage de la mer, en fussent entieremēt priuez, pour en inuestir le Roy d'Espagne, comme d'un fief de l'Empire, à la charge de le remettre par infeodation subalterne & dependante du Roy Catholique, à celuy qui luy semblera estre le plus legitime successeur : c'est à dire, à celuy qui luy fera plus affidé partisan. Ainsi sans les François, le Duc de Mantouë, & les autres Princes d'Italie, se fussent contentez peut estre, de ce qu'on appelle maintenant entre les sages vne Piombmade, qui est un droit nouveau, pour oster les Estats à un Prince, en faueur d'Espagne, à la charge d'en dire grand mercy, pourueu qu'ils leur en rendent vne partie : selon la courtoisie que l'on fait aux passans que l'on volle dans vne Forest, de leur donner de quoy payer à la premiere hostellerie.

Ie suis asseuré, dit le Roy, que ce n'est pas Exemberg qui a fait ceste relation : car il est trop Espagnol, Non Sir, dit le Duc, il ne l'est pas naturellement : mais par accident. Car il est tellement hay en tout l'Empire, qu'es'il n'auoit cet appuy, il seroit perdu : Et ainsi il faut qu'il finisse en cet estat, parce qu'il n'a point d'autre remede qui luy puisse soulager les éternelles gouttes qui le tiennent attaché dans vn lit, faisant les affaires avec grande adref-



se & esprit, ayant peu de pareils au monde : mais il est si caché & couuert, qu'il est mal aysé de penetrer son intention, ayant continuelles douceurs & belles paroles à la bouche : mais au reste si obscur, qu'il faut vne bonne Lanterne, pour voir ce qu'il veut & ce qu'il pense. Il est Italien couuert de nature, & y ayant adjousté l'art, il s'y est tellement habitué, que ie crois qu'en ces prieres mesmes Dieu seul peut entendre ce qu'il veut dire.

I'ay pris grand plaisir de vous ouyr, dit le Roy, mais encores ne suis-je pas content. Car comme ie vous tiens pour bon Italien, (& en disant cela ie dis beaucoup) ie veux sçauoir de vous vostre sentiment de la France. Sire, respondit-il, ie sçay qu'Antonio Perez a dit autresfois à vostre Majesté, qu'il estoit certain, que les François n'auoient point de pareils en courage : mais que si on y pouoit adiouster trois choses, *Roma, la Mer, y el consejo*, ils seroient pour conquerir toute la terre. Pour le Pape, entendu sous le nom de Rome, il s'est porté en sorte, que les deux partis s'en peuvent loüer : Pour la Mer, la dispute qui est de long temps entre le Duc de Guise, & le General des Galeres, empesche que le Roy vostre fils ne soit assez puissant de ce costé-là, pour tenir la coste de Genes en sujettion, & rendre difficile les communications d'Espagne en Italie. Ce qui est vn extreme preiudice à la France, pour agir en cet endroit, comme il seroit tres-avantageux, si on le faisoit, & si on y pouoit mettre vn aussi bon ordre, que le Cardinal de Richelieu a fait en la mer de Ponant, le Roy vostre fils feroit trembler tout le monde.

Pour ce qui est du Cōseil, si le lieu où ie suis ne m'empeschoit de croire les fables des Anciens, ie n'estimerois pas seulement que l'Ame du Cardinal Ximenes, fondateur de la puissance d'Espagne, fust entree dans le corps



du Cardinal de Richelieu; mais ie croirois aussi, qu'au contraire, ainsi que le Gerion des Poëtes auoit vne ame dans trois corps; Qu'en celuy de ce Prelat François, les esprits de ces trois Cardinaux, Albornoz, Mendoza & Ximenes, y seroient diuinement infus; tant on voit reluire en ses actions tous les plus rares traits de prudence & de sage-gouuernement, qui a bien paru, en ce qu'il a tousiours conjoint la negotiation avec la guerre, l'une desquelles nuit à l'autre, pour ceux qui ne sçauent pas s'en ayder avec vne egale adresse. Ne s'estant point veu, que pour auoir recherché les moyens raisonnables de Paix, cela luy aye fait relascher en sorte quelcō que le soin de maintenir les armées en bon estat, & de surmonter toutes les difficultez de la peste, des saisons, de la situation des lieux de l'incommodité des viures, comme Collalto me l'a raconté, qu'il a veu à ses despens & avec admiration: m'ayant confessé ingenuëment, que sans les diuers artifices, dont ils vsoient tous de leur costé, sous pretexte de limitations & reuocations de pouuoirs, & autres tels ambages, le Cardinal pressoit les affaires avec telle vigueur, lumiere & sincerité, qu'en peu de temps elles eussent esté terminees, si l'on eust autāt cherché le repos de la Chrestienté, & celuy de l'Italie, qu'un peu de fumée; qui a fait pleurer Spinola en mourant, tant elle luy donna dans les yeux.

Ie ne m'ennuirois iamais d'ouïr parler le Duc de Monteleon, qui a conserué tousiours l'affection de ses ancestres à la Couronne de France, dit le Roy. Mais d'où vient cette melancholie que vous auez eüe en m'abordant? Des pensees fascheuses que i'auois de l'Italie, respondit le Duc, d'où ie ne puis iamais parler, que ie ne sois remply de douleur, veu le miserable estat où ie l'ay veüe reduite sur l'approche des deux armées deuant Casal: où,



cōme Lisander disoit dās son repas deuāt le cōbat, *Faisons bonne chere à cette heure, car nous souperons peut. estre tous en Enfer*; Ainsi pouuoient-ils dire deuant la bataille, dont le gain; de quelque costé qu'il eust esté, eust changé entièrement la face de ces Pays-là: mais bien plus, si la victoire eust esté du costé des Espagnols. Car il falloit s'asseurer lors, qu'il n'y auroit plus de Princes en Italie, autre que le conquerant, qui en eust changé l'autorité, les loix, & les mœurs. Et cela n'entre iamais en mon esprit, que ie ne l'aye saisi d'horreur, & c'est ce qui m'a donné ceste mauuaise grace que i'ay eüe en arriuant.

Après cela, le Roy voulut estre informé par Villeroy, de l'État d'Angleterre & de la Hollande: qui luy dit, que les affaires n'alloyent pas avec la vigueur, comme du tēps que le gouuernement estoit entre les mains d'une femme, qui se monstra si amie de la France, & ennemie de l'Espagne, qu'elle ne voulut iamais se separer de l'un, ny faire la paix avec l'autre. Aujourd'huy il semble que ceux-cy ne sçauent faire la paix ny la guerre; ils attaquerent la France sans sujet, & mal leur en prit; aussi de mēme, firent-ils la paix sans raison, au temps qu'ils la conclurent: qui ne laissē d'en faire esperer de bons effets maintenant, s'ils sçauent bien se seruir du temps: Mais ils ont joint de grands obstacles, par le Traicté qu'ils ont faict, duquel ils ne recoluent aucun fruiēt que des paroles, & hazardent beaucoup, en accordant l'entree libre de leurs ports. à certain nombre de Vaisseaux Espagnols: qui est, comme s'ils recueilloient dans leur sein, durant les rigueurs de l'hyuer, des viperes, qui estans reschauffez, sans auoir esgard à la courtoisie, ne laisseroient de faire ce qui est de leur naturel. Ainsi deuoiēt-ils apprehēder l'aprouche de ces gens-là parmi eux, parce qu'estans perpetuellemēt dās les menees, ils enflammeront avec mille artifices, les haines



de la Religion dans les Prouinces : & ceux qui sont violentes dans leurs consciences, s'esucilleront & chercheront les moyens de secoier le ioug, & de porter la confusion par tout : Non pas pour le soustien de la Religion, car les Espagnols seroient bien marris, que ces pays là fussent conuertis, pource qu'ils perdroient le pretexte de les empieter comme heretiques, ce qu'ils feront toutes les fois qu'ils pourront, parce qu'ils ne manqueront iamais de rompre la Paix quand ils auront occasion, commode de faire la guerre.

Pour les Hollandois, on dit bien que le Prince d'Orange est d'un naturel mol, qui ayme le repos, & qui voudroit iouir sans plus de trauail du fruit de ses victoires passees, se plaissant dans la douceur de cette bonne renommee qui les rend tres-glorieux : Toutesfois comme il est accort, & ceux qui gouernent, sages, ils iugent bien, que la demande que les Espagnols font de la paix, est plus par impuissance que par bonte : parce qu'estans occupez en tant de guerres, les forces leur manquent, pour les Pays-bas, & pour la deffence de leurs Indes, dans lesquelles, si on continue de faire la guerre, c'est ruiner l'Espagne, luy coupant les nerfs par lesquels sa grandeur subsiste, & toutes les autres puissances languissent, & en fin perissent. Ils se souuiennent que la derniere Treue qu'ils ont faite, a esté la ruine de tous leurs Alliez en Allemagne, ayant donné moyen à l'Empereur, n'estant occupé ailleurs, de leur courre sus, & de les enuahir : & si on la refaisoit à cet heure, ce seroit luy faciliter l'acheuement de ce qui reste : parce qu'on y employeroit l'argent d'Espagne, qui se depend en Flandres.

Ainsi ils ont bien plus d'auantage en la guerre qu'en la paix : estans bien asseurez, que l'Empereur n'ayant point l'argent d'Espagne ne remuera rien : Pour ne vouloir pas



consommer son bien, qu'il aymera mieux conseruer à ses enfans, que de l'employer pour l'auantage des autres.

Comme le Roy estoit attentif à ces discours, il apperceut de loing Bonneuil, qui venoit courant, pour arriuer à luy : & avec vne ioye extreme il s'escria, Voicy Bonneuil, voicy Bonneuil : Nous sçaurons des nouuelles fraisches : & lors il commença à l'embrasser, & luy demander s'il y auoit long tēps qu'il estoit party. Fort peu, Sire, dit-il en riant : car de la comedie où i'estois Mardy en fort bonne santé, ie n'ay mis que cinq iours à venir icy. Et bien dit le Roy, en quel estat avez-vous laissé la Cour ? Alors Bonneuil, regardant deux ou trois fois autour de luy & derriere, respondit : Je supplie tres-humblement vostre Maiesté, qu'elle me pardonne si ie ne parle hault : Car i'ay esté tant de fois broüillé, que tout me fait peur en ce lieu, où ie suis nouveau venu, & aussi que les personnes de qui i'aurois à parler, sont si puissantes, que ie ne me puis fier qu'en vous pour en ouuir la bouche.

Alors le Roy licentiant la compagnie iusques au lendemain, prend Bonneuil par la main & l'emmene dans vne grande allée couuerte, sans qu'on aye encor peu rien apprendre de la matiere de laquelle il l'entretenoit.

F I N.